

కొరింధియుల్క రెగిడ్లి దొన్నిచి ఉత్త్రుమ్ బారిక్ జలో పవులు కొరిండ్ పట్టుమ్చ సంగుమ్చక రెగిడ్లి దొన్నిచి ఉత్త్రుమ్

మొదోల్ కోడు

¹ దేముడుచి నెలవ్చి రిసా, క్రీస్తు జలో యేసుచి రిసా సుబుమ్ కబుర్ నూనయ్తో జోచో బారికి జా అస్సి పవులు రెగిడ్లిసి. కొరిండ్ పట్టుమ్తెచి దేముడుచ సంగుమ్చక, చి ఒండి అకయ ప్రదేసిమ్తెచ జోచయ్ జల అన్నె మాన్సుల్క ఆవ్ పవులు తిమోతి తెన్ రెగిడ్లి ఉత్త్రుమ్.

² అమ్క అబ్బో జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్. ³ ఎత్తి దయక అబ్బో జలో, అమ్చి ఆత్మతె అమ్క డిట్టుమ్ దయిరిమ్ కెర్తొ దేముడు జలో, అమ్చో ప్రబు జలో యేసుచో దేముడు అబ్బోస్కయ్ జోబర. ⁴ అమ్చ బాదల్ ఎత్తితె జో అమ్క డిట్టుమ్ దయిరిమ్ కెర్తయ్, చి జో అమ్కయ్ కెర్తి డిట్టుమ్ దయిరిమ్చి రిసా, అన్నె కీస బాదల్ సేడ్లసక ఆమ్ కి డిట్టుమ్ దయిరిమ్ కెరుక జతయ్. ⁵ కీసి మెలె, క్రీస్తు సేడ్ల సైమల్తె ఆమ్ కీసి బెదితసుమ్ గే, దస్సి, జోచి తెడి తా, జో దెతి డిట్టుమ్తె దయిరిమ్తె కి అమ్ బెదితసుమ్. ⁶ తుమ్క 'డిట్టుమ్ దయిరిమ్ జతు, రచ్చించుప జతు' మెనయ్ అమ్ సైమల్ సేడ్లసుమ్. తుమ్కయ్ 'డిట్టుమ్ దయిరిమ్ జతు' మెనయ్ ప్రబుయి అమ్కయ్ డిట్టుమ్ దయిరిమ్ కెర్తయ్. ఆమ్ సేడ్ల అల్లర్ తూమ్ కి సేడ బమ్మ నే జత ఓర్పుప జలె, జోచి డిట్టుమ్ దయిరిమ్ తూమ్ కి జస్తె. ⁷ తుమ్చి రిసాచి అమ్చి నముకుమ్ పిట్టె నాయ్. కిచ్చొక మెలె, ఆమ్ సేడ్ల సైమల్ తూమ్ కి సేడ్లె,

అమ్మకయ్ దొర్కు జతి డిట్టుమ్ ఆస దయిరిమ్ తుమ్కయ్ కి దొర్కు జయెదె.

⁸ ఓ బావుడ్లు, ఆసియా ప్రదేశిమ్తె అమ్ సేడ్లి బాద కెద్ది గే తుమ్ నే జాన్తి రితి జలె, చెంగిల్ నాయ్ మెన అమ్ ఉచర్తుసుమ్. జా బాద కెద్ది మెలె, అమ్క కెద్ది పెల్లితె తిలి మెలె, 'ఓర్పుప జంక నెత్తుమ్ ఒగ్గర్ మొరుమ్దె గె కిచ్చొగే' మెలి రితి అన్మానుమ్ అమ్క పెలిత్ తిలి.

⁹ నిజుమి, మొర్తి సిచ్చు అమ్ వయిలి రితి అమ్క పెట్టి డిసిలి; తెద్ది బాద తిలి. గని అమ్ తెద్ది బాద సేడుక ప్రబు కిచ్చొక సెలవ్ దిలన్ మెలె, అమ్చి సొంత సెక్కిక అమ్ నే నంప కెర్తె, మొర్తసక అన్నె జియడ్తో దేముడుకయ్ అమ్ నంప కెరుకయ్ అన్నెచి రిసొయి జో జా సెలవ్ దిలన్. సొంత సెక్కిక కిచ్చొ నెత్తుమ్. ¹⁰ తెద్ది ప్రమాదుమ్ తెంతో జో అమ్క రచ్చించుప కెర్లన్, చి అన్నె దస్సి అల్లర్ సేడ్లె, అన్నె అమ్క రచ్చించుప కెరెదె మెన అమ్క దయిరిమ్. 'జొయ్యి అమ్క అన్నె రచ్చించుప కెరెదె' మెన, జోచి ఉప్పిరి అమ్ పూర్తి నముకుమ్ తియ్ అన్నుమ్. ¹¹ అమ్చి రిసొ తూమ్ కి ప్రార్దన కెర కెర అమ్క తోడు తా, చి ఒగ్గర్జన్ ప్రార్దన కెర్లి రిసొ ప్రబు అమ్క రచ్చించుప కెర్లో మెనయ్, ఒగ్గర్జన్ జోచి సర్ద సంగుల.

కొరింధిల్క పవులు నిదానుమ్ కెర్లిసి

¹² జలె, సర్ద తెన్ కిచ్చొ సాచి సంగితసుమ్ మెలె, ప్రబుచి సుద్ది తెన్ జోచి ఎక్కి నిదానుమ్ తెన్ ఈంజ లోకుమ్తె, ముక్కిమ్క తుమ్చితెయ్ ఇండ అన్నుమ్; మాన్సుచి సెక్కి గ్యానుమ్క నాయ్, గని దేముడుచి దయచి సెక్కిక. ¹³ దస్సి, కిచ్చొ లుంకడ్డి రితి నాయ్, గని ఎత్తి తుమ్ సొస్టుమ్ అర్దుమ్ కెరంతి రితి జయ్యి అర్దుమ్ అమ్ రెగ్గితసుమ్. ¹⁴ ప్రబు జలొ యేసు ఈంజ లోకుమ్చక తీర్పు కెర్తి వెల్లి దీసిక 'చెంగిల్ అస్తి' మెన తుమ్చి రిసొ ఆమ్ కీసి సర్ద జమ్దె గే, అమ్చి రిసొ తుమ్క దస్సి సర్ద తంక జయెదె మెన తుమ్ అప్పె ఇదిల్ అర్దుమ్ కెరన అన్నున్. తుమ్క 'జా కోడు పూర్తి అర్దుమ్ కెరంతు' మెనయ్ అంచి ఆస.

15 అంచి ఈంజ దయిరిమ్చి రిసా తుమ్తె తొలితో జెంక ఉచర తిలయ్. గెచ్చుక జతి జలె, తుమ్క దొవ్వెర్ దెకితయ్, తివ్వెరి నర్ద జతయ్. 16 తొలితో మాసిదోనియ ప్రదేసిమి గెతె తిలి వట్టె తుమ్తె గోత్ గెచ్చుక చి జా మాసిదోనియ ప్రదేసిమ్ తెంతో అన్నె వట్టె ఉట్ట అయ్లె పొది కి తుమ్తె జెంక ఉచర తిలయ్. దస్సి, ఆవ్ అన్నె యూదయ ప్రదేసిమ్తె గెచ్చుక బార్ జలె పొది తుమి అంక బార్ కెర తెద్రయ్తదు.

17 జలె, దొన్ని మెన్సుల్ తాఁ 'జెయిందె' మెలయ్ గే? మాములుమ్ ఈంజ లోకుమ్చి బుద్ది తెన్ 'జెయిందె' జవున్ మెన దొన్ని మెన్సుల్ తా ఆరి సంగిమ్దె గే? జెంక ఉద్దెసుమ్ నెంజిలె 'జెయిందె' మెనిందె గే? 18 ఆవ్ దసా మాన్సు నెంజి. కచితుమ్ దేముడు నముకుమ్చొ, జాకయ్ ఆమ్ తుమ్క సంగితి దేముడుచి కొడొ ఆరి నెంజె గని కెయ్యక కి నిజుమి. 19 దేముడుచొ పుత్తుసి జలో యేసుక్రీస్తు; *సిల్వాను తిమోతి చి ఆవ్ తుమ్తె బోదన కెర్తొ క్రీస్తు; దసాచొ నెంజె. సంగిల్ రితి జో కెరెదె. ఆమ్ కి దస్సి. 20 దేముడు అబ్బొసి సంగ తిలి ఎత్తి కొడు, ఎత్తి ప్రమానుమ్ క్రీస్తుతెయ్ కచితుమ్ నెరవెర్పుప జతయ్. దస్సికయ్, క్రీస్తుచి నావ్ తెన్ని †తెద్దిలి మెన సంగితనుమ్. ఇసి ఒప్పణ్లె, దేముడుక గవురుమ్ దెతనుమ్; 'క్రీస్తుతెయ్ ఎత్తి నెరవెర్పుప కెర్తయ్' మెనయ్. 21 అన్నె, దేముడు అబ్బొసి సొంత అమ్క తుమ్క క్రీస్తుచి తెడి డిట్టుమ్ కెర్తయ్, చి జోచి కామ్ కెరుక మెన అమ్క నిసాన అదికారుమ్ దా అస్సె. 22 జొయ్యి అమ్క 'అంచయ్ మాన్సుల్' మెన జోచి ముద్ద గల అస్సె, చి జోతె అమ్క దొర్కు జతి వాటక 'కచితుమ్ దెయిందె' మెన అమ్క అప్పె కి రుజ్జు తతి రిసా, అమ్చి పెట్టి జోచి ఆత్తు దా అస్సె.

కొరింధిల్క పవులు దుకుమ్ కెరుక నెసిలిన్చి కొడు

* 1:19 1:19 జోవయించి అన్నెక్ నావ్ సీలయ్యు. బారికుల్ 15:27. † 1:20 1:20 గ్రీకు బాస తెన్ 'అమేన్' మెనుల.

23 గని దేముడు అంచి రిసా సాచి జవున్! తుమ్తె కొరింధ్తె ఆవ్ కిచ్చొక అన్నె జెంక నేతయ్ మెలె, తుమ్క సిచ్చ కెరుక నెసి. 24 తుమ్చి నముకుమ్చి ఉప్పిరి ముద్దొ కెరుక అమ్క అదికారుమ్ నాయ్, తుమ్క ఏలుప కెరుక అమ్క ఇస్తుమ్ నాయ్. నముకుమ్క జలె, డిట్టుమ్ అన్నున్. గని, తుమ్క 'సర్దనంతోసుమ్ తెన్ తత్తు' మెనయ్, తుమ్క తోడ్ తంకయ్ అమ్చి ఉద్దెసుమ్.

2

1 జాకయ్, జా సుట్టుచి రితి ఆవ్ తుమ్తె జా తుమ్క దుకుమ్ కెరుక నెసి. 2 ఆవ్ తుమ్క దుకుమ్ కెర్లె, తుమ్చి దుకుమ్క ఆవ్ దుకుమ్ జతిసి అన్నె కో అంక సర్ద కెర్లొసా తయెదె? తూమ్ కి దుకుమ్ జా తస్తె, ఆవ్ కి దుకుమ్ జా తయిందె.

3 జా ఉత్తమ్తె కిచ్చొక జా ఏక్ కోడు రెగిడ్లయ్ మెలె, ఆవ్ తుమ్తె దస్సి అయ్లె తుమ్ అంక సర్ద తెన్ బెదవంతన అంక దుకుమ్ కెర్తదు. జా ఓర్పుప జంక నెతిర్తయ్. అగ్గె తెంతొ తుమ్క ఆవ్ నంప కెర తిలయ్, చి 'అంక సర్ద తిలె తుమ్కయ్ కి సర్ద తయెదె' మెన ఉచర తిలయ్. 4 జా సుట్టు తుమ్క ఉత్తమ్ రెగిడ్లిసి, జలె, తుమ్క దుకుమ్ కెరయ్తి ఇస్తుమ్ తెన్ రెగ్గి నాయ్, గని తుమ్క అంచి ఒగ్గర్ ప్రేమ దెకయ్తి రిసాయి దస్సి రెగిడ్లయ్. పెట్టి ఒగ్గర్ బాద సేడ ఏడ, ఏడయ్ రెగిడ్లయ్.

5 జో మాన్సు అంక దుకుమ్ కెరయ్లిసి, జలె, ఎక్కి అంకయ్ దుకుమ్ కెరయ్లిసి నెంజె. దస్సి కెర తుమ్ ఎత్తిజిన్క కి ఇదిల్ జవున్ దుకుమ్ కెర తయెదె. గని జోక జా పూచి ఒగ్గర్ వయడుక నెసి. 6 ఎత్తిజిన్ జోక సిచ్చ రితి కెర్లిసి సరి జలి. 7 జాకయ్, ఒగ్గర్ దుకుమ్క జో పాడ్ నే జతి రిసా తుమ్ అప్పె జోక చెమించుప కెర బెదవన డిట్టుమ్ దయిరిమ్ కెర. 8 'జోచి రిసాచి తుమ్చి ప్రేమ జోక దెకవ' మెన ఆవ్ బతిమాల్ప జా సంగితసి. 9 అంచి కోడు సూన కెరుల గే నాయ్ గె మెన రుజ్జు దెకుక 'జోక తుమ్ సిచ్చ కెర' మెన జా తుమ్క

ఉత్తమతె రెగిడ్లయ్. 10 తుమ్ కక్క చెమించుప కెరై, ఆవ్ కి జోక చెమించుప కెరైసి. ఆవ్ కిచ్చొ చెమించుప కెరుక తిలి మెలె, తుమ్చి రిసాయి చెమించుప కెరైయ్ మెలె, క్రీస్తుచి మొక్కె ఆవ్ సంగితని. 11 కిచ్చొక మెలె, సయ్తాన్ అమ్చి ప్రేమ పిట్టవుక ఉచరెదె. జోచి కుట్టల్ జానుమ్చి రిసా 'జో అమ్చి ఉప్పిరి జీనుస్ నాయ్' మెనయ్ ఆవ్ ఇసి తీర్పు కెర అస్సి.

పవులు మాసిదోనియ ప్రదేసిమ్తె గెలిస్

12 జలె, క్రీస్తుచి సుబుమ్ కబుర్ కామ్చి రిసా ఆవ్ త్రోయ పట్టుమ్తె గెచ్చ పావెలయ్. సుబుమ్ కబుర్ ఆవ్ సూనయ్తి రిసా ప్రబు అగ్గెచి అవ్కాసుమ్ దిలన్. 13 గని, బావొ జలో తీతు తుమ్చితె తెంతో ఒత్త బుల జెంక నేతయ్చి రిసా బాద సేడ జా పట్టుమ్చతె సెలవ్ నజన, అన్నె బార్ జా సముద్దుమ్ జీన, మాసిదోనియ ప్రదేసిమి ఉట్ట గెలయ్.

సుబుమ్ కబుర్ కామ్చి రిసాచి సర్ల

14 గని దేముడుక జోబర, సయ్తాన్ అల్లర్ కెరై కి, క్రీస్తుచి తెడి జో దేముడు అమ్క జీనయ్తయ్, చి జీన్లొ క్రీస్తుచి పట్టి అమ్ కేనె గెలె కి, కెయ్చ తెయ్చ జోక జాన్తినచి వాసెన అమ్చి అత్తి జో ఒండి దెకయ్తయ్. 15 కిసి మెలె, రచ్చన జతసక కి, నాసెనుమ్ జతసక కి దేముడు అబ్బొన్క డయిలి దూపుమ్ వాసెన రితొ క్రీస్తుచి వాసెన ఆమ్. 16 జా వాసెనక దెక, జలె, నాసెనుమ్ జతసక కి అమ్ మొర్పుచి వాసెన, గని రచ్చించుప జతసక కి జీవుమ్చి వాసెన జా అస్సుమ్. దస్సి జలె, ఇసి ప్రబుచి కామ్ కెరుక కేన్ మాన్సు విలువ జవుల? 17 ఆమ్, జలె, జేవ్ వేర మాన్సుల్చి రితి లాబుమ్క ప్రబుచి కోడు సికయ్తన నెంజుమ్. అమ్ విలువ నెంజిలె కి, ఎక్కి నిదానుమ్ తెన్ తిలిసి తిలి రితి, నెంజిలిసి నే తిలి రితి దేముడుచి మొక్కె జోచి అదికారుమ్ తెన్ క్రీస్తుచి తెడి తా జోచి కోడు సూనయ్తనుమ్.

3

అమ్చి సత్తిమ్చి రుజ్జుక ప్రబు సాచి

¹ అమ్ అన్నె అమ్చి సొంత గవురుమ్ నజనుక దెర అస్సుమ్ గే? నెంజిలె, అమ్చి సత్తిమ్చి రుజ్జుక తుమ్తె సాచి ఉత్తల్ నజనుమ్దె గే? సగుమ్జిన్క దస సాచి రుజ్జుల్ తంక, గని అమ్క నాయ్. ² తుమ్కయ్ దెకిలె, అమ్చి సత్తిమ్క రుజ్జు దెకయ్తి ఉత్తమ్ రితి తుమి జతను; తుమ్చి పెట్టి రెగిడ్లి జా ఉత్తమ్ ఎత్తిజిన్ సదు కెర అర్దుమ్ కెరనుక జయెదె. ³ పడ్డె, అన్నె కిచ్చొ సొస్టుమ్ డీస్తయ్ మెలె, క్రిస్తొ సొంత రెగిడ్లి అమ్చి అత్తి వేర మాన్సుల్తె తెద్రయ్లి ఉత్తమ్, తూమ్ జస్తె మెన డీస్తయ్. సిర్ర తెన్ రెగిడ్లిసి నెంజె, గని జీవ్ తిలో దేముడుచి సుద్ది తిలి ఆత్మయి రెగిడ్లిసి జా, పత్రె రెగిడ్లిసి నెంజె, గని మాన్సుచి పెట్టి రెగిడ్లిసి. ⁴ క్రిస్తొచి తెడి, దేముడు అబ్బొన్చి మొక్కెదస్సి మెన అమ్క దయిరిమ్.

దేముడు దిలి అగ్గెచి ప్రమానుమ్

⁵ అమ్చి సొంత సెక్కిక కిచ్చొ కెరుక తెరుమ్ మెన ఉచరుమ్ నాయ్, నెత్తుమ్. అమ్చి సెక్కి కేనె తెంతొ జెతయ్ మెలె, దేముడు తెంతొయ్. ⁶ యేనుక నంపజత మాన్సుల్క జో దిలి నొవి ప్రమానుమ్చి రిసా అమ్ సూనవుక మెన జొయ్యి అమ్క సెక్కి దా అస్సె. ఈంజ నొవి ప్రమానుమ్ తిలిసి కిచ్చొ పత్రె గే, పుస్తకుమ్తె గే రెగిడ్లి కిచ్చొ కిచ్చొ ఆగ్గుల్చి నెంజె, గని జో దేముడుచి సుద్ది తిలి ఆత్మ మాన్సుచి పెట్టి రెగిల్లిసి. *పత్రల్తె జవున్, కాగ్గుల్తె జవున్, రెగిడ్లి ఆగ్గుల్ అమ్ మాన్సుల్చి పాపుమ్ దెకవయ్ అమ్క నింద కెర మార్త, గని మాన్సుచి పెట్టి దేముడుచి సుద్ది తిలి ఆత్మ రెగిడ్లిసి మాన్సుక †జియడ్డయ్.

⁷ జలె, పత్రె రెగిడ్లి ఆగ్గుల్చి మాన్సుల్క మార్తి సేవ దేముడు మోసే పూర్గుమ్చొచి అత్తి దిలి పొది, జో దేముడుచి పరలోకుమ్చి ఒగ్గర్ ఉజిడి తెన్ గవురుమ్ తెన్ దొర్కు జలి. కెద్ది ఉజిడి కెద్ది గవురుమ్

* 3:6 3:6 రోమియల్ 7:5, 8-11, నిర్గమకాండుమ్ 24:12, 31:18. † 3:6 3:6 రోమియల్ 6:6.

మెలె, దేముడు తెన్ జో దస్సుల్ జా తిలిన్చి ఉజిడక గవురుమ్క ఇస్రాయేలు ప్రెజల్ మోసేచి మొక్క దెకుక నెతిర్ల. పూర్గుమ్చి జా ఆగ్గుల్ తెన్ చి ప్రమానుమ్చి ఉజిడి గవురుమ్, మాత్రుమ్, తొక్కి జా జా, కేడ గెలి. ⁸ దస్సి కేడయ్ గెతి గవురుమ్ ఉజిడిచి కంట, దేముడుచి సుద్ది తిలి ఆత్తుచి సెక్తిచి సేవచి గవురుమ్ ఉజిడి ఒగ్గర్ జయె నాయ్ గె? జయెదె. ⁹ కిచ్చొక మెలె, మాన్సుక నింద కెర్తి ఆగ్గుల్ సేవచి గవురుమ్ ఉజిడి ఒగ్గర్ తిలె, మాన్సుచి పాపుమ్ పుంచ జోవయింక పున్నిమ్ దెతి సేవక అన్నె ఒగ్గర్ గవురుమ్ ఒగ్గర్ విలువ తయెదె. ¹⁰ ఇన్నెచి రిసా కిచ్చొ మెనుక జయెదె మెలె, జాచి కంట జిన్ని గవురుమ్ జిన్ని విలువ తిలిన్చి రిసా, అగ్గెయ్ గవురుమ్చి విలువ తిలిన్క అప్పెయి కిచ్చొ గవురుమ్ కిచ్చొ విలువ నాయ్. ¹¹ కేడయ్ గెలిన్క గవురుమ్ విలువ తిలి జలె, కెద్దొడ్ తెదొడ్ తాఁ గెలిన్క అన్నె ఒగ్గర్ గవురుమ్ ఒగ్గర్ విలువ తయెదె.

¹² ఇని మెన అమ్క దయిరిమ్చి రిసా, దయిరిమ్ తెన్ ఈంజ నొవి ప్రమానుమ్చి రిసాచి సత్తిమ్ సూనయ్తసుమ్. ¹³ మోసేచి రితి అమ్ జము నాయ్. జో, జలె, 'కేడ గెతి జా ఉజిడి కేడ గెతిసి ఇస్రాయేలుల్ మెల అమ్చ ప్రెజల్ దెకుత్ నాయ్,' మెనయ్, దేముడుతె తెంతో ఉట్ట అయ్లి పొది లాజ్ జా మొకొమ్ డంకనొ.

¹⁴ జలె, జేవ్ ఇస్రాయేలుల్ కీస జల మెలె, జోవయించి పెట్టి బేడు బందిల్ రితి జల, చి అజి ఎద కి అగ్గెచి ప్రమానుమ్చి వాట జేవ్ సదు కెర్తె పొది, మొకొమ్ డంకన తతి రితి పెట్టి సత్తిమ్ చినితి నాయ్. కిచ్చొక మెలె, క్రీస్తుచి తెడి మాన్సు తిలెకయ్ జా డంకిలిసి దేముడు కడ వెంట గెలెదె. ¹⁵ నిజుమి, అజి ఎద మోసేచి అత్తి రెగిడ్డిసి దేముడుచ కొడో జేవ్ కెయ్య సదు కెర్తె కి, జోవయించి పెట్టి యేసుక్రీస్తుచి రిసాచి సత్తిమ్ చినుక నెతిర్తి. ¹⁶ గని, మాన్సు మార్పువ జా ప్రబుతె అయ్లె, జా డంక అడ్డు జలిసి కడి జతయ్, చి జో ప్రబుచి సత్తిమ్ చినుల.

¹⁷ అన్నె, ప్రబు ఆత్తుయి జయెదె, చి దేముడుచి సుద్ది తిలి ఆత్తు కేనె తయెదె గే, ఒత్తయ్ రచ్చన తయెదె. ప్రబుచి ఆత్తు అమ్చి పెట్టి

తిలె, ఆగ్నల్చి సేవచ గొతిమాన్సుల్ తము నాయ్, విడ్డల్ జా తమ్దె. 18 అన్నె, దేముడుచి సుద్ది తిలి ఆత్మతె జెర్మున్ జల అమ్ ఎత్తిజిని, కిచ్చొ డంకిలిసి అడ్డు నెంతె ప్రబుచి ఉజిడి జోచి గవురుమ్ దెకితె తా, జోచి ఉజిడ్తె గవురుమ్తె బెద, జోచి పొలిక జతి రితి తిరీమ్ తిరీమ్ మార్సుప జతె అస్సుమ్, చి జోచి ఉజిడి జోచి గవురుమ్ తిరీమ్ తిరీమ్ అగ్గెచి కంట అమ్ ఇండితిన్తె అన్నె డీస్తయ్. ఈంజ ఉజిడి ఈంజ గవురుమ్ దేముడుచి సుద్ది తిలి ఆత్మయి జలొ ప్రబు తెంతొయ్ జెతయ్. జొయ్యి జా కామ్ జర్గు కెర్తయ్.

4

సుబుమ్ కబుర్ కామ్ నిదానుమ్ తెన్ కెర

1 జలె, దేముడుచి దయక చి సేవ అమ్క జో సొంత తియార్ అస్సెచి రిసా, అమ్చి నిదానుమ్ దయిరిమ్ పిట్టె నాయ్. 2 కిచ్చొ పాపుమ్ తెన్ మాయ తెన్ బోదన కెరుక నెసిలమ్, నెనుమ్. కిచ్చొ మోసిమ్ కెరుమ్ నాయ్, ప్రబుచి సుబుమ్ కబుర్తె కిచ్చొ వేరచి బెదవుమ్ నాయ్, గని సొన్టుమ్ సత్తిమ్ సంగితసుమ్. దస్సికయ్ కో నూన్లె కి 'సత్తిమ్' మెన అమ్చి రిసా ఒప్పుసుక జయెదె. 'సత్తిమ్' మెన దేముడు కి ఒప్పునెదె.

3 అమ్ బోదన కెర్తిన్ సుబుమ్ కబుర్చి అర్దుమ్ ఇదిల్ లుంకిల్ రితి జలె, కక్కయ్ లుంక తయెదె మెలె, నాసెనుమ్ జతసకయ్. 4 జోవయింకయ్, జలె, జేవ్ నంప నే జతసకయ్, ఈంజ లోకుమ్క ఏలుప కెర్తొ సయ్తాన్; నాసెనుమ్ జతస జోక 'దేముడు' మెనుల; జొయ్యి జోవయించి మెన్నుక గుడ్డి కెర అస్సె. కిచ్చొక మెలె, 'దేముడుచి పొలిక వూర్తి తిలొ క్రీస్తుచి గవురుమ్ దెకయ్తి సుబుమ్ కబుర్చి ఉజిడ్ జతి సత్తిమ్ దెకుత్ నాయ్' మెనయ్ జేవ్ మాన్సుల్క జో సయ్తాన్ జోవయించి మెన్నుతె గుడ్డి కెర అస్సె.

5 అమ్ బోదన కెర్తసి, జలె, అమ్చి రిసాచి నెంజె, గని యేసుక్రీస్తుక 'ఎత్తిక ఏలుప కెర్పు' మెన దేముడు అబ్బొసి జోక ప్రబు కెరయ్ అస్సె

మెనయ్ అమ్ బోదన కెర్తనుమ్. జో యేసుచి సేవ చి ప్రేమచి రిసా తుమ్చ *సేవ కెర్తన రిత జా అస్సుమ్. ⁶ కిచ్చొక మెలె, +“అందర్ తెంతో ఉజిడ్ జవున్” మెన సంగిలో దేముడు అమ్చి పెట్టి జోచి ఉజిడి దా అస్సె. కిచ్చొక మెలె, క్రిస్తుచి మొక్కె డిస్తి ఆవ్ దేముడుచి గ్యానుమ్ ఉజిడి మాన్సుల్ దెక చిన అంక జాన్తు అంచి ఉజిడ్తె జెతు మెనయ్, జో దేముడు ఈంజ సేవతె అమ్క బెదవ అస్సె.

ప్రబుచ కామ్ జోచి అత్తి జో జోచి సెక్తి తెన్ కెర్తయ్

⁷ దేముడు జోచి ఈంజ ఉజిడ్ సొమ్మారుమ్ రితయ్ గేడివొతె బెరవ అస్సె. కిచ్చొక మెలె, అమ్ గేడివొక సెక్తి నాయ్, విలువ నాయ్ చి రిసా అమ్ సెక్తి నెంజిలసచి అత్తి జో జోచి కామ్ కెర్లె, ‘దేముడుచియి, మాన్సుచి నెంజె’ మెన జా సెక్తిక మాన్సు చినుక జయెదె. ⁸ రగరగాల్చ బాదల్ అమ్క పెలిలెకి, పెల్లి జా బీడ గెచ్చుమ్ నాయ్; జోచి సెక్తిచి రిసా, సగుమ్ బాదల్ కిచ్చొక సేడ్తనుమ్ గే అమ్ అద్దుమ్ కెరనుక నెతిర్లె కి, జో దిలి కామ్చి రిసా ఆన నెంజిలస జము నాయ్. ⁹ విరోదుమ్ సుదల్చి అత్తి అమ్ అల్లర్ బలెకి ప్రబు అమ్క ములె నాయ్. అమ్చ విరోదుమ్ సుదల్ అమ్క బూసిల్ రితి కెర్లె కి, మొరుమ్ నాయ్. ¹⁰ యేసు కిసి మొర్తి రితి జతె తా బాదల్ సేడ్తె తిలన్ గే, ఆమ్ కి ఈంజ జీవితమ్క మొర్తె తతి రితి అస్సుమ్. గని ఆమ్ మొర్తి రితి జా సెక్తి నెంజిలిన్తెయి యేసుచి సెక్తి డిస్తయ్. యేసు అన్నె జీవ్ జా పరలోకుమ్తె ఏలువ కెర్తి సెక్తి, అమ్ సెక్తి నెంజిలస రచ్చన జతిన్తె డిస్తయ్. ¹¹ కిచ్చొక మెలె, యేసుచి జీవ్ అమ్చి మొర్తి ఆగ్తె డీసున్ మెనయ్, అమ్చి ఈంజ జీవితమ్తె యేసుక్రిస్తుచి నావ్చి రిసా అమ్ మొర్తుక దెర్ను సేడ్తనుమ్.

¹² జలె, ఆమ్ మొర్తనుమ్, తూమ్ జితసు!

¹³ గని

‡“నంప జలయ్ చి సంగిలయ్”

* **4:5** 4:5 నెంజెల, ‘గొతిమాన్సుల్, గొత్తి మాన్సుల్’. † **4:6** 4:6 ఆదికాండుమ్ 1:3.

‡ **4:13** 4:13 కిర్తనలు 116:10.

మెన పూర్గుమ్ సంగిలో రితి ఆమ్ కి నంపజా అన్సుమ్చి రిసా ఆమ్ కి అమ్చి నముకుమ్ తిలిసి సంగితనుమ్. 14 ఇసి దయిరిమ్ తెన్ ఆమ్ నంపజలిసి కిచ్చొక సంగితే తత్తునుమ్ మెలె, ప్రబు జులో యేసుక అన్నె జియడ ఉట్టయ్లోసా జోవయించి నావ్ తెన్ అమ్కయ్ కి అన్నె జియడ ఉట్టవ, తుమ్క అమ్క జోతె కడ నెయెదె మెన జానుమ్. 15 కిచ్చొ కిచ్చొ బాదల్ కిచ్చొక ఓర్నుప జతనుమ్ మెలె, తుమ్చి రిసాయి. మెలె, ప్రబుచి రచ్చున అన్నె ఒగ్గర్జిన్క పావిలె, ప్రబుచి దయచి రిసా అన్నె ఒగ్గర్జిన్ జోక జోచి సర్ల తెన్ జోబర సంగ జోక గవురుమ్ కెరుల.

16 జాకయ్ అమ్చి దయిరిమ్ పిట్టె నాయ్. అమ్చి ఈంజ లోకుమ్చి ఆగ్ పాడ్ జతె తిలె కి కువితె తిలె కి, రోజుక అమ్చి ఆత్మ అన్నె నొవర్ జెర్మిల్ రితి జా సెక్తి జతయ్. 17 ఈంజ మదెనె చి ఇదిలిదిల్ అల్లర్ కిచ్చొ కామ్క జెతయ్ మెలె, పరలోకుమ్తెచి నే కేడ్డి ఒగ్గర్ ఉజిడతె గవురుమ్తె అమ్ బెదితి రిసా అమ్క దొర్కు జయెదె. 18 అప్పె డిస్టిన్చి ఉప్పిరి నముకుమ్ తిము నాయ్; పరలోకుమ్తెచి నే డిస్టిన్కయ్ నంప కెర్తనుమ్. కిచ్చొక మెలె, డిస్టిసి పాడ్ జతిసి, నే డిస్టిసి పరలోకుమ్తెచి జలె, తాఁ గెచ్చెదె.

5

పరలోకుమ్తె ఆమ్ తతిసి

1 అన్నె కిచ్చొ జానుమ్ మెలె, ఈంజ లోకుమ్తె అమ్ జితి కుడియ జతి అమ్చి ఆగ్ పాడ్ జలెకి, పరలోకుమ్తె అమ్క కెయ్క తెయ్క తెయ్క తాఁ గెతి గేర్ అమ్చొ దేముడు అమ్క దా అన్నె. కేన్ మాన్సు తెయార్ కెర్లిసి నెంజె, దేముడు తెయార్ కెర్లిసి, జా. 2 నిజుమి, ఈంజ లోకుమ్తె తిలె పొది దుకుమ్ జతనుమ్, చి పరలోకుమ్చి అమ్చి గేర్ నజనుక ఆస జతనుమ్. 3 జా గేర్ మెలిసి నజనె, పాలుమ్ గలన్చి రితి జయెదె, చి ఆమ్ డుమ్డి తయె నాయ్. 4 ఈంజ అప్పెచి కుడియతె అమ్ తతి పొది, అమ్చ బాదల్ చి రిసా దుకుమ్ తెన్ అన్నుమ్. ఈంజ కుడియ, ఈంజయ్ పాలుమ్, గెస్సు మేనుమ్ నాయ్, గని అన్నె చెంగిల్ గేర్

చెంగిల్ పాలుమ్ గలన్తి రిసా, పరలోకుమ్చి జా గేర్ జయి పాలుమ్ గలన్లమ్ మెలె, అమ్చి ఈంజ లోకుమ్చి మొర్నుక పరలోకుమ్చి నే కేడ్డి జీవు తతిసి జిన గెచ్చెదె.

⁵ పరలోకుమ్తె జతి రిసా అమ్క తెయార్ కెర్లొసా దేముడుయి, చి 'జర్గు జయెదె' మెన అమ్క కిచ్చొ గుర్తు జో దా అస్సె మెలె, దేముడుచి నుద్ది తిలి ఆత్మ అమ్చి పెట్టి జో దా అస్సె. ⁶ జాకయ్, కిచ్చొ జలెకి అమ్క దయిరిమ్. ఈంజయ్ ఆగేతె, ఈంజయ్ లోకుమ్తె అమ్ జతి పొది, ప్రబుక దూరి అస్సుమ్ మెన జానుమ్. ⁷ పరలోకుమ్తెచి ప్రబు అమ్క దిలి అప్పె దస్సే డీసె నాయ్, గని జాక 'అస్సె' మెలి నముకుమ్ తెన్ని ఇండితసుమ్. ⁸ 'అమ్ పరలోకుమ్తె గెచ్చుమ్దే' మెన దయిరిమ్ తెన్ అస్సుమ్, చి 'ఈంజ ఆగుక ముల ప్రబుతె గెచ్చ జెలె చెంగిలి' మెన జానుమ్.

ప్రబుచి ఇస్టుమ్ రితి కెర్తి ప్రేమ

⁹ జలె, ఇన్నె ఈంజ అగి అమ్ జింక తిలె కి, ఒత్త పరలోకుమ్తె గెచ్చుక తిలె కి, అమ్చి ఆస కిచ్చొ మెలె, ప్రబుక సర్ద కెర జోచి ఇస్టుమ్ రితి కెర్తుకయ్. ¹⁰ ఈంజ లోకుమ్తె ఈంజ అగి తిలె పొది అమ్చితె కో సత్తిమ్తె ఇండిల గే పాపుమ్తె ఇండిల గే, క్రీస్తుచి అత్తి అమ్ తీర్పు జంక, అమ్ జోచి మొక్కె టీవో జతి జా దీసిక జలె, ఈంజ జీవితమ్తె కో సత్తిమ్ ఇండ తవుల గే, జోక బవుమానుమ్, కో పాపుమ్తె ఇండ తవుల గే, జోవయింకయ్ సిచ్చ ప్రబు దెయెదె.

¹¹ ప్రబు లోకుమ్చక పరిచ్చ కెర తీర్పు కెరెదె మెన జానయ్, జా బయిమ్ తెన్ మాన్సుల్క సికడ్డుసుమ్. అమ్చి సత్తిమ్ జో దేముడు జానె, చి తుమ్చి పెట్టి తూమ్ కి చినితసు, కిచ్చొగె. తుమ్క 'చినుత్' మెనయ్ అమ్చి ఆస. ¹² తుమ్తె అమ్క గవురుమ్ దొర్కు జెయదె మెన తుమ్ ఉచర నాయ్. గని, మాన్సుచి పెట్టి తిలిసి నే చినితె మాన్సు ముక్కిమ్చొ రితో డీసిలెకయ్ గవురుమ్ కెర్తన సగుమ్జిన్ అమ్చి రిసా తుమ్క అన్మానుమ్ సికడ్డుతి. తుమ్క 'జేవ్ అన్మానుమ్ సికడ్డుక కీసి జబాబ్ దెంక గే జాన్తు' మెనయ్ అమ్ ఇసి సొంతచి

రిసాచి సాచి రెగిడ్తునుమ్. అమ్చి సత్తిమ్ జాన్లై, తుమ్ జబాబ్ దెంక జాన్తె, జాకయ్ తుమ్క సంగితనుమ్. గవురుమ్ ఆననుక ఉచర కిచ్చొయ్ కెరుమ్ నాయ్. 13 జలె, అమ్క 'వెర్రి జల' మెన తుమ్ తీర్పు ఉచరై జలె, 'అమ్ వెర్రి రితి డీస్తన్తె దేముడుక లాబుమ్ తిలె దస్సి డీసుమ' మెంతనుమ్. జోచి కామ్ కెర్తి ఆనకయ్ ఇసి జతనుమ్. నాయ్ మెలె, 'బుద్దికయ్ దస్సి సంగితతి' మెన అమ్చి రిసా తుమ్ బప్పన్లై, చెంగిలి. తుమ్కయ్ 'చెంగిల్ జతు' మెనయ్ ఇసి జతనుమ్.

14 క్రీస్తు ప్రేమచి రిసా అమ్ తుక్కె తంక నెత్తుమ్. అమ్క జోచి ప్రేమ పెలయ్తయ్. క్రీస్తు ఎక్కిలో అమ్ ఎత్తిజిన్చి పాపుమ్ గెచ్చయ్తి రిసా మొర్లన్ మెన అమ్ దెకితనుమ్. జో మొర్లన్ తెన్ అమ్ ఎత్తిజిన్ మొర్లై రిత జా జోక నంపజలి తెంతో సొంత ఇస్తుమ్ జర్గు కెర్తి రితి ఇండుమ్ నాయ్. 15 కిచ్చొక మొర్లన్ మెలె, అమ్ జితన ఎత్తిజిన్క 'సొంత ఇస్తుమ్ అయ్లి రితి నాయ్, గని జోచి రిసా మొర అన్నె జితోసొక గవురుమ్ కెర్తి రితి జతు' మెనయ్ జో మొర్లన్.

క్రీస్తుచి తెడి నొవ మాన్సుల్

16 అప్పె తెంతో మాములుమ్ జోచి ఈంజ లోకుమ్చి జెర్మున్క కక్కయ్ దెకుమ్ నాయ్. అగ్గయ్ క్రీస్తుచి మాములుమ్ ఈంజయ్ లోకుమ్చి జెర్మున్కయి కిసి తిలొ గే, దస్సి జోక దెకిత్ తిలమ్, గని అప్పెయి జోక దస్సి దెకుమ్ నాయ్. జో దేముడు జలిన్ రుజ్జు జలిన్కయ్ జోక దెకితనుమ్. 17 గని, కో క్రీస్తుచి తెడి తవుల గే, జోచి అగ్గెచి జెర్మున్క మొర్లి రితి జా తా జోచి ఆత్మతె జెర్మున్ జా నొవర్ రగుమ్ జా అస్తి. నొవర్ జెర్మున్ జలి రితి జా అస్తి. అగ్గెచి గెచ్చ, నొవిచి బార్ జా అస్సె, చి నొవిచికయ్ దెకితనుమ్.

18 మాన్సు నొవర్ జతి ఈంజ వరుమ్ కెనె తెంతో జెతయ్ మెలె, దేముడు తెంతో. జో క్రీస్తుచి నావ్ తెన్ అమ్చి పాపుమ్ పుంచ కెర అమ్క జోక అడ్డు తిలి పాపుమ్ గెచ్చవ గెల కెర అమ్క అన్నె బెదవన్లన్, చి 'వేర మాన్సుల్ కి అమ్చొ క్రీస్తుక నంపజలె జోవయింక

కి దస్సి అన్నె బెదవనిందె' మెనయ్ జోచి సుబుమ్ కబుర్ నూనయ్తి సేవ జో దేముడు అమ్క తియార అస్సె.

19 మెలె, క్రీస్తు బలి జలిన్ తెన్ జోవయించి పాపుమ్ పుంచ నే వయడ్తె, దేముడు లోకుమ్చక బెదవంతె అస్సె, చి జో బెదవంతిన్చి కబుర్ నూనయ్తిసి అమ్చి అత్తి జో సొర్ప కెర దా అస్సె. 20 జాకయ్, క్రీస్తుచ బారికుల్ జా అస్సుమ్. 'క్రీస్తుక నంపజతు' మెనయ్ దేముడు అబ్బొసి అమ్చి అత్తి మాన్సుల్క బుకార్తయ్. జాకయ్, 'దేముడు తెన్ బెదితి వరుమ్ తుమ్ నజనా' మెనయ్, క్రీస్తుచి నావ్ తెన్ తుమ్క అమ్ బతిమాల్పా జా సంగితసుమ్.

21 అమ్క 'అంచి పున్నిమ్ జతు' మెనయ్ పాపుమ్ నెంజిలో పాపుమ్ నేన్లో జోచొ పుత్తుసి అమ్చి పాపుమ్ రితి దేముడు అబ్బొసి జోక టీవడ్తె.

6

రచ్చన నజన్తి సమయుమ్ నిజుమి జా అస్సె

1 జలె, "దేముడుచి రచ్చన నజనా" మెన సంగితసుమ్, గని జోచి నావ్ తెన్ అన్నె కిచ్చొ మెంతసుమ్ మెలె, జోచి దయ ఆరి నజన తా నాయ్. 2 కిచ్చొక మెలె,

*"చెంగిల్ సమయుమ్క తుమ్చ ప్రార్దన నూన అస్సి, చి

ఆవ్ రచ్చన కెర్తి కాలుమ్క తుమ్క తోడు జా అస్సి"

మెన పూర్గుమ్ తెంతో దేముడుచి కొడొతె రెగ్డవ అస్సె. అల్లె! 'చెంగిల్' మెలి జా సమయుమ్ అప్పెయి. రచ్చన జతి జా కాలుమ్ అప్పెయి.

సుబుమ్ కబుర్ రిసా పవులు అల్లర్ జలిసి

3 అమ్ ప్రబుచి సేవ కెర్తిన్తె కేన్ నింద నే జెతె, కో కిచ్చొ సంగుక నెత్తిర్తి రితి, కచి నముకుమ్ పిట్టయ్తి కిచ్చొయ్ అడ్డు కెరుమ్ నాయ్.

4 ప్రబుచి సేవ పూర్తి నిదానుమ్ కెర్తసుమ్ మెన సాచి సంగన్తసుమ్. ఇన్నెచి రుజ్జు కిచ్చొ మెలె, కిచ్చొ కిచ్చొ ఒగ్గర్ అల్లర్ ఓర్పుప జా

* 6:2 6:2 యెసయా 49:8.

నిదానుమ్ తెన్ అస్సుమ్. కిచ్చొ అల్లర్ మెలె, బాదల్, సైమల్, కస్టల్, ఇర్కులు, ⁵ కొర్డల్చ దెబ్బలు, జేలి జలిసి, జట్టు తెన్ నిగ జా మాన్సుల్ అమ్క అల్లర్ కెర్దిసి, ఒగ్గర్ కామ్ కెర టక్కిలిన్, గూన్ నెంజిలిసి అందర్లు, చువ్వె తిలిసి; దసచ ఎత్తి నిదానుమ్ తెన్ ఓర్పుప జా అస్సుమ్.

⁶ పడ్డొ జోచి సేవచి అమ్చి నిదానుమ్ అమ్ ఇండిలి బుద్దితె కి డీస్తయ్. వేర బుద్దుల్ అమ్ నే జలిన్తె, ప్రబుచి ఎత్తి అమ్ జాన్తిన్తె, మాన్సుల్చ తప్పుల్ అమ్ ఓర్పుప జతిన్తె, మాన్సుల్క అమ్ మరియాద దెకితిన్తె, దేముడుచి సుద్ది తిలి ఆత్మ అమ్చి పెట్టి తిలిన్తె, మాయ నెంజిలి అమ్చి ప్రేమతె. ⁷ సత్తిమ్చి బోదన అమ్ కెర్తిన్తె, దేముడుచి సెక్తి అమ్చ కమెతె డీస్తిన్తె, ఈంజ ఎత్తితె అమ్చి నిదానుమ్ డీస్తయ్. డెబ్రి పక్క కి, ఉజెతో పక్క కి, కామ్క జెత పున్నిమ్చి అయ్దల్ వాడిక కెరన నిదానుమ్ తత్తసుమ్. ⁸ జాకయ్, గవురుమ్ జలెకి, నిస్కారుమ్ జలెకి, మాన్సుల్ అమ్క 'చెంగిల్చ' మెలె కి, 'గార్చ' మెలె కి, నిదానుమ్ తత్తసుమ్. సగుమ్జిన్ అమ్క 'మాయచ' మెంతతి, గని సత్తిమ్ కెర్తసుమ్. ⁹ సగుమ్జిన్ అమ్క విలువ దెకిత్ నాయ్, గని సగుమ్జిన్ విలువ దెకితతి. 'బే బేగి మొరుల' మెన అమ్క సగుమ్జిన్ ఉచర్తతి, గని జితసుమ్. దెబ్బల్ కతసుమ్ గని మొరుమ్ నాయ్. ¹⁰ అమ్చ బాదల్క దుక్కుమ్ జంక జతయ్, గని సర్దసంతోసుమ్ తెన్ అస్సుమ్. ఈంజ లోకుమ్చి ఆస్తిక ఉచర్లె బీద అస్సుమ్, గని ఒగ్గర్జిన్క సామ్సారుమ్ కెర్తసుమ్. అమ్క కిచ్చొ నెంజిలె కి, ఎత్తి కలుగు జలి రితి జా అస్సుమ్.

అమ్క కి తుమ్ ఎదిలి ప్రేమ కెర

¹¹ ఓ తుమ్ కొరిందిలు, కిచ్చొ నే లుంకడ్డె ఈంజ ఎత్తి తుమ్క ఎదార్దుమ్ సొస్టుమ్ సంగ అస్సుమ్. అమ్చి పెట్టితె తుమ్క ఒగ్గర్ ప్రేమయ్ అస్సుమ్. ¹² అమ్చి రిసొచి తుమ్చి ప్రేమక ఆమి కిచ్చొ ఇర్కు కెరుమ్ నాయ్. తుమ్చి సొంత పెట్టి తుమి ఇర్కు కెరంతసు. ¹³ అంచ బోదల్ జల రిత ఓ తుమ్ కొరిందిల్, తుమ్క ఆవ్ కిచ్చొ

మెంతసి మెలె, ఆమ్ తుమ్కయ్ కీసి ప్రేమ అస్సుమ్ గే, తూమ్ కి దస్సి ఆమ్కయ్ ప్రేమ కెర మెన ఆవ్ బతిమాల్ప జా సంగితసి.

14 ప్రబుక నంప నెంజిలస తెన్ తుమ్ లంకె జా నాయ్. పాపుమ్తె పున్నిమ్ తిలిసి కీసి బెదెదె?! నెంజిలె, అందర్బుద్ది తెన్ ఉజిడ్ బుద్ది కీసి బెదెదె? బెదె నాయ్! 15 ‘బెలియాల్’ మెలో సయ్తాన్ తెన్ క్రీస్తు కీసి బెదెదె? బెదె నాయ్! నంపనెంజిలోసా తెన్ నంపజిలోసాక క్రీసి వాట తియిదె? తయె నాయ్! 16 దేముడుచి గుడి, జలె, బొమ్మల్క జొకర్తెన్ తెన్ కీసి బెదెదె? నెంజె! కిచ్చొక ఆవ్ ఇసి సంగితసి మెలె, జీవ్ తిలో దేముడుచి గుడి ఆము. పూర్గుమ్ దేముడుచి కొడొతె రెడ్డయ్లి రితి,

+“జోచి పెట్టి ఆవ్ జియిందె,

జోచి తెన్ ఆవ్ బులిందె,

ఆవ్ జోవయింఱొ దేముడు జయిందె.

జెవ్వి అంచ ప్రెజల్ జవుల”

మెన అన్నె,

17 †“జాకయ్ ‘అంక నంప నెంజిలస తెంతొ తుమ్ బార్ జా’ మెన ‘సుద్ది నెంజిలిసి తుమ్ చడ నాయ్.

దస్సి ఎక్కి నిదానుమ్ జలదు మెలె,

తుమ్క బెదవనిందె’ మెన ప్రబు సంగితయ్”

మెన అన్నె,

18 ‡“అంచ బోదల్ మెనయ్ తుమ్కయ్ అబ్బొది జయిందె,

చి అంక ‘అబ్బొ మెనయ్ అంచ పుత్తర్లు దువొ జస్తె’

మెన ఎత్కి సెక్తి అదికారుమ్ తిలో ప్రబు సంగితయ్.”

మెన రెడ్డ అన్నె.

7

సుద్ది జతిన్

† 6:16 6:16 లేవీయకాండుమ్ 26:12, యిర్మీయా 32:38, యెహెజ్కేలు 37:27.

‡ 6:17 6:17 యెసయా 52:11, యెహెజ్కేలు 20:34, 41. § 6:18 6:18 నమూయేలు దొన్నిచి పుస్తకుమ్ 7:14, 7:8.

1 జాకాయ్, ప్రేమ తిల బావుడ్లు, దేముడు అమ్క ఈంజేవ్ ప్రమానల్ సంగ అస్సెచి రిసా, అమ్చి ఆగ్గక, అమ్చి ఆత్మక కిచ్చొ గార్ కెరెదె గె, జా గెచ్చవన గెల కెరయ్, దేముడు ప్రబుక బియఁ కెర, అమ్ సుద్ది జంక *దెర్లిసి పూర్తి జతి రితి జోచి సుద్ది ఆననుమ. 2 అమ్క తుమ్చి పెట్టితె బెదవన. అమ్ కక్క తప్పు కెరుమ్ నాయ్, కక్కయ్ పాడ్ కెరుమ్ నాయ్, కక్కయ్ మోసిమ్ కెర లాబుమ్ కెరనుమ్ నాయ్. 3 తుమ్క నింద కెర్తి రిసా ఇసి సంగి నాయ్, అగ్గె కిచ్చొ మెన రెగిడ్లయ్ మెలె, 'అమ్చ జివుతె తుమ్చి రిసా ప్రేమయ్ అస్సుమ్' బెద మొరుమ్దె, బెద జిమ్దె. 4 తుమ్చి రిసా అంక నముకుమ్ ఒగ్గర్ అస్సె, తుమ్ అంచి అత్తి సూన నంపజలదు చి రిసా ఆవ్ గవురుమ్ సంగితసి, తుమ్చి రిసా అంచి పెట్టి పూర్తి దయిరిమ్ అస్సె. అమ్చ బాదల్ ఒగ్గర్ జలెకి, అంచి పెట్టి సంతోసుమ్ బెరయ్ అస్సె.

5 †మాసిదోనియ ప్రదేసిమి అమ్ ఉట్ట అయ్లి పొది అమ్చి ఆగ్గక సుక్కుమ్ నాయ్, గని ఎత్తి రగల్ బాదల్ సేడ్డెయ్ తిలమ్; విరోదుమ్ సుదల్ కెర్ల అల్లర్చి రిసా కి, అమ్చి పెట్టిచి బయిమ్చి రిసా కి, 6 గని ముసుర్చు జలసక డిట్టుమ్ దయిరిమ్ కెర్లొ దేముడు, జలె, తీతుక అమ్తె తెద్దవ అమ్క దయిరిమ్ కెర్లొ. 7 ఎక్కి తీతు అయ్లిసి తెన్ దయిరిమ్ జము నాయ్, గని తుమ్చి నిదానుమ్ దెక జొయ్యి దయిరిమ్ జలిస్క అమ్కయ్ కి జో దయిరిమ్ కెర్లొ. మెలె, అంక అన్నె దస్సుల్ జంక చి తుమ్చి ఆస, అంక తుమ్ దుకుమ్ కెర తిలిన్చి రిసాచి తుమ్చి దుకుమ్, అంచి రిసాచి తుమ్చి ప్రేమ నిదానుమ్చి రిసా అమ్క సంగిలన్, చి అన్నె ఒగ్గర్ సర్ద జలయ్.

8 అంచి ఉత్తమ్తె ఆవ్ రెగిడ్లిన్ తెన్ తుమ్క ఆవ్ దుకుమ్ కెర్లొ కి, ఆవ్ ఉచర్క నాయ్. విసారుమ్ జా తిలయ్, గని తప్పు కెరి నాయ్ మెన జాని. జా ఉత్తమ్ తుమ్క దుకుమ్ కెర్లొ, గని

* 7:1 7:1 కొరింధిల్క రెగిడ్లి దొన్ని నంబర్ ఉత్తమ్ 3:18, దెస్సలొసికుల్క రెగిడ్లి ఏక్ నంబర్ ఉత్తమ్ 5:23. † 7:5 7:5 జేవ్ కొరింధిల్ తిలి అకయ ప్రదేసిమ్క మాసిదోనియ ప్రదేసిమ్ ఉత్తర పక్క అస్సె.

గడియకయ్ మెన ఆవ్ దెకితసి. ⁹ జలె, అంక సర్ద. తుమ్క దుకుమ్ కెర్లె రిసా నాయ్, గని తుమ్ దుకుమ్ జా తప్పు ఒప్పున చెంగిల్ జలదు చి రిసాయి. మెలె, తుమ్చి దుకుమ్ ప్రబుచి సత్తిమ్ తుమ్క ఉచరవడ్లిన్చి రిసాయి తుమ్క అమ్ కెర్లిసి కిచ్చొ సంతోసుమ్ కెరె నాయ్. ¹⁰ కిచ్చొక మెలె, ప్రబు ఉచర్లిసి దుకుమ్ అమ్ మాన్సుల్చి పెట్టి అయ్లె, అమ్ కెర్లె పాపల్ ఒప్పున బుద్ది జంక ఇస్తుమ్ జమ్దె, చి ప్రబుచి రచ్చన నజనుమ్దె. జా రచ్చనచి రిసా 'చెంగిల్ జలమ్' మెనయ్, అన్నె దుకుమ్ తయె నాయ్. గని ఈంజయ్ లోకుమ్చి బుద్దిచి దుకుమ్ అమ్ పెట్టి తియ్లె, అమ్క మొర్ను జెయెదె.

¹¹ ఈందె, దేముడు తెద్రయ్లి దుకుమ్ తుమ్చి పెట్టి కెర్లి నిదానుమ్ ఉట్టవ అస్సె! నిజమ్, తుమ్చి సత్తిమ్ దెకయ్తి ఆస ఉట్టవ అస్సె! జా తప్పుచి రిసా లాజ్ జా తుమ్చి ఉప్పిరి తుమి కోప్పుమ్ జలదు, దేముడుచి తీర్పుక బిలదు, అమ్చి తెన్ అన్నె బెదుక ఆస జలదు, సత్తిమ్ జంక ఆస జలదు. జా తప్పుచి రిసా సరిగా తీర్పు కెర్లదు. జా ఎత్కితెయి తుమ్ అప్పె సత్తిమ్ జలిసి డీస్తయ్. ¹² జాకయ్, ఆవ్ తుమ్క రెగిడ్లిసి దుకుమ్చి తిలె కి, ఒత్త కిచ్చొ లాబుమ్ మెలె, ముక్కిమ్క తప్పు కెర్లొసొక ఉచరి నాయ్, ముక్కిమ్క అల్లర్ సేడ్లొసొక ఉచరి నాయ్, గని జా ఉత్తమ్చి రిసా ముక్కిమ్క కిచ్చొచి రిసా ఉచర్తసి మెలె, అమ్చి రిసాచి తుమ్చి ఒగ్గర్ ఆస, ప్రబుచి మొక్కె తుమ్ అప్పె చినన అస్సెన్. ¹³ తుమ్ చెంగిల్ జలిన్చి రిసా అమ్క సర్ద, అమ్క అన్నె డిట్టుమ్ దయిరిమ్ కెర్లి. అమ్ సొంత సర్ద జలిన్చి కంట కిచ్చొక అన్నెయ్ సంతోసుమ్ జా అస్సుమ్ మెలె, తీతు తుమ్తె జా దెకిలి తెంతో, తుమ్చి రిసాచి జోచి అగ్గెచి అన్మానుమ్ నాయ్, చి సర్దసంతోసుమ్ జో జా అస్సె. ¹⁴ తుమ్చి రిసా అంచి సర్ద, ఆవ్ గవురుమ్ ఉచరంతిసి, జోక అగ్గె తెంతో సంగితె తిలయ్, చి జో తుమ్తె గెలి పొది జోచి మొక్కె కిచ్చొ తప్పుల్ కెర అంక లాజ్ కెరయ్సు నాయ్, అంచి మరియాద కడ్పు నాయ్. అమ్ తుమ్కయ్ సంగిలిసి ఎత్కిచి సత్తిమ్ కిసి రుజ్జు జలి గే, దస్సి తుమ్చి

రిసా ఆమ్ తీతుక సంగిలిసి నిజుమ్ జలి. ¹⁵ అప్పె జో తుమ్క అగ్గెచి కంట ఒగ్గర్ ప్రేమ ఉచర్తయ్. ప్రబుచి ఇస్తుమ్ తుమ్ ఎత్తిజిన్ కెర్లిన్చి రిసా కి, తుమ్ ఎత్తిజిన్ బియిఁ అద్దుర్ తెన్ జోక బెదవన్లిన్చి రిసా కి జో ఉచార కెర్తయ్. ¹⁶ జలె, తుమ్చి రిసా ఆవ్ పూర్తి దయిరిమ్ జా అస్సిచి రిసా అంక ఒగ్గర్ సర్దసంతోసుమ్.

8

యెరూసలేమ్చి సంగుమ్చ తోడు దెతిన్చి రిసా

¹ అప్పె, బావుడ్లు, తుమ్క కిచ్చొ సంగితసుమ్ మెలె, మాసిదోనియ ప్రదేసిమ్చ ప్రబుచ సంగుమ్లుచ మాన్సుల్చి పెట్టి దేముడు ప్రేమ సికడ్లసి రుజ్జు జా అస్సె. ² కీసి మెలె, జోవయించి నిదానుమ్ పరిచ్చ జలి రితి జా జేవ్ ఒగ్గర్ కస్టల్ సేడ్డె తిలె కి, జేవ్ ఒగ్గర్ బీద జలెకి, ప్రబుచి, జోవయించి ఎదివాట్ సర్దచి రిసా ఒగ్గర్ దర్ముమ్ తెన్ అన్నె జేవ్క *తోడు దా అస్సి. ³ జేవ్చి రిసా ఆవ్ కిచ్చొ సాచి సంగితసి మెలె, జోవయించి సెక్తి తిలి ఎదిలి, నాయ్, గని జోవయించి సొంత ఇస్తుమ్క తెర్లి ఎదిలి కంటయ్ అన్నె జేవ్ ఒగ్గర్ దా అస్సి. ⁴ †యెరూసలేమ్చ నంపజలసక తోడు దెతిన్తె ఆమ్ కి బెదుమ్దె' మెనయ్ అమ్క బలవంతుమ్ కెర్ల. ⁵ 'ఇసి దస్సి కెరుల' మెన మాములుమ్ అమ్ ఉచర్లి రితి నాయ్, గని 'అమ్చి అత్తి ప్రబు జోవయించి ఇస్తుమ్ పూర్తి కెర్చు' మెన, తొలితొ ప్రబుచి అత్తి జోవయించి జీవ్ సార్చ కెర, పడ్డొ జోవయించి తెడి అమ్చి అత్తి దిల.

⁶ జాకయ్ తుమ్ కొరిందిల్చి రిసా కి అమ్ ఉచర్లమ్, చి బీద సుదల్క దెతి దర్ముమ్ †తుమ్ ఉక్కిల్తిసి, తీతు మొదొల్ కెర్లిన్క 'పూర్తి జర్లు జవ్చన్' మెన, తీతుక బలవంతుమ్ కెర అస్సుమ్. ⁷ జలె, నముకుమ్క, ప్రబుచి గ్యానుమ్క, జోచి గ్యానుమ్ సొస్తుమ్ బోదన

* **8:2** 8:2 రోమియల్ 15:25-27. † **8:4** 8:4 యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతొచ నంపజలస తోడు తెర్తయ్ల. బారికుల్ 1:28-30.
‡ **8:6** 8:6 కొరిందిల్క రెగిడ్లి ఏక్ నంబర్ ఉత్తుమ్ 16:1-4.

కెర్తినక, నిదానుమ్క, చి అమ్చి ఉప్పిర్చి తుమ్చి ప్రేమక, దస్సిచి ఎత్తిక తుమ్ కిసి నిదానుమ్ జా అన్నున్ గే, దస్సి ఈంజ దర్ముమ్ దెత్తినక కి దయ ఒగ్గర్ జతి రితి తుమ్ దెకన.

8 ఆవ్ ఇసి సంగితిసి ఆడ్ర దెతిసి నెంజె, గని మాసిదోనియ ప్రదేసిమ్చ జేవ్ అన్నె మాన్సుల్ తోడు దా సత్తిమ్ కెర్లినక తూమ్ దెక తుమి పరిచ్చ కెరన్లె, బీద సుదల్క తోడు కెర్తి తుమ్చి ఉద్దెసుమ్క 'నిజుమ్చి' మెన తుమ్ రుజ్జు దెకయ్తి అవ్కాసుమ్ తుమ్క దొర్కు జవున్ మెనయ్ ఆవ్ తుమ్క ఉచరయ్తసి. 9 ప్రబు జలొ యేసుక్రీస్తు సొంత కి జోచి దయక కిచ్చొ కెర్లన్ గే జానుమ్. మెలె, పరలోకుమ్చి సొమ్మారుమ్ జోక తిలె కి, తుమ్చి రిసొ బీద కెరన్లొ; తుమ్క సొమ్మారుమ్ కెరుక మెనయ్ జో బీద జలన్.

10 జలె, ఈంజ డబ్బుల్ ఉక్కిల్తి కామ్చి రిసొ కిచ్చొ ఉచర తుమ్క ఆవ్ సంగితసి మెలె, వెర్సెక్ అగ్గె తుమ్ ఇస్తుమ్ జా మొదొల్ కెర్లిసి తుమ్ అప్పె పూర్తి జర్గు కెర్లె చెంగిలి. 11 తుమ్క జా ఇస్తుమ్ అస్సె. జలె, జా జర్గు కెర్లెకయ్ జా ఇస్తుమ్ నెరవెర్చుప జయెదె. తుమ్ తెర్లి ఎదిలికయ్ జర్గు కెర. 12 ఎక్కిలొ దెంక మెన తెయార్ మెన్ను తెన్ తిలె, జాక సెక్కిక జిన్లిన్ నెంజె గని తిలిస్తెయ్ సర్ల తెన్ దిలె ఇస్తుమ్ జయెదె. నెత్తిరిసి నే కెర్లె, మాన్సుక నింద నాయ్.

13 వేర మాన్సుల్క జేవ్చి పూచి వయడ నాయ్, తుమ్కయ్ జా జాడు ఎత్తి వయుతు మెని నాయ్, 14 గని, 'ఎత్తిక సమానుమ్ జతిసి తవున్' మెన జోవయింక నెంజిలిసి రిసొ తుమ్చి సొమ్మారుమ్క తుమ్ అప్పె దాస. ఏక్ వేల పణ్ణొక తుమ్కయ్ కొత్తు తిలె, జేవ్ తుమ్కయ్ తోడు కెరుక జయెదె, చి ఎత్తిజిన్క సమానుమ్ జతిసి తయెదె. 15 పూర్ము దేముడుచి కొణొతె రెగ్గయ్లి ఏక్ కోడుచి అర్దుమ్ తుమ్ ఉచర.

§“ఒగ్గర్ కుడవన్లొసొక కిచ్చొ సేనె నాయ్, గని తొక్కి కుడవన్లొసొక కిచ్చొ కొత్తు తయె నాయ్”

§ 8:15 8:15 నిర్ణమకాండుమ్ 16:18.

మెన రెగిడ్లి కోడు.

తీతుక కొరింధ్ పట్టుమ్తె అన్నె తెద్రయ్లి

16 దేముడుక జోబర! తుమ్చి రిసా జో తీతుచి పెట్టి కి జోవయించి ప్రేమ దా అస్సె. 17 “కొరింధ్తె ఈంజ కామ్క గో” మెన అమ్ బతిమాల్పా జా సంగితికయ్, “గెచ్చిందె” మెలన్. గని ఎక్కి ఆమి సంగిల్ రిసా నాయ్, గని అన్నెయ్, తుమ్చి రిసాచి జోచి ప్రేమకయ్ జోచి సొంత ఇస్టుమ్కయ్ జెతయ్.

18 జో తెన్ అన్నె కక్క తెద్రయ్తసుమ్ మెలె, జో సుబుమ్ కబుర్ సూనయ్తన్చి రిసా ఎత్తి. సంగుమ్లుతె, ఎత్తిజిన్ మెన్నితో బావొక తెద్రయ్తసుమ్. 19 పడ్డె, ‘ప్రబుచి గవురుమ్ దెకయ్తి అమ్చి ప్రేమ దెకయ్తి ఈంజ తోడు దెతి కామ్తె అమ్చి తెన్ బులుస్’ మెనయ్ సంగుమ్లుచ జోక నిసాన అస్తి. జో, జలె, తీతు తెన్ గెతయ్. 20 ఆమ్ డబ్బుల్ ఉక్కుల వంట దెతి ఈంజ దర్ముమ్చి సేవచి రిసా కో అమ్క నింద నే కెర్తి రితి, ఈంజ కామ్తె కిచ్చో పొరపాట్ బెదవుమ్ నాయ్, కిచ్చో పొరపాట్ బెదయ్లి రితి డీసుక కి నెసుమ్, 21 చి ప్రబుచి మొక్కె కి, మాన్సుచి మొక్కె కి, కీసి సత్తిమ్ కెరుక గే సరిగా ఉచర అస్సుమ్. జాకయ్, సంగుమ్లుచ నిసాన మాన్సుక కి అమ్చి తెన్ ఈంజ తోడు దెతిన్తె బెదవన అస్సుమ్.

22 అన్నె, జేవ్ దొగుల తెన్ అన్నెక్కో బావొక తెద్రయ్తసుమ్. ఇన్నెక అగ్గె తెంతో కిచ్చో కిచ్చో కమె దా అస్సుమ్ చి కిచ్చో కామ్తె కి నిదానుమ్ కెర్తయ్ మెన రుజ్జుల్ దెక అస్సుమ్. తుమ్చి రిసాచి జోవయించి ఒగ్గర్ నముకుమ్చి రిసా, వేర కమెచి కంట తుమ్తెయ్ గెచ్చుక అన్నె ఒగ్గర్ ప్రేమ ఈంజో జా అస్సె.

23 తీతు, జలె, తుమ్చి రిసాచి అంచి సేవతె జో అంచి తెన్ ఎక్కి రితి బెద అస్సె. జేవ్ అన్నె దొగుల బావుడ్లు, జలె, సంగుమ్లుచి నావ్ తెన్ జోవయించ బారికుల్ జల రిత జా గెతతి, క్రీస్తుచి గవురుమ్ దెకయ్తతి. 24 జాకయ్, తుమ్చి ప్రేమక, చి ఈంజేవ్ ఆవ్ తుమ్చి

రిసా నముకుమ్ సంగిలిన్క, 'నిజుమి జో సంగిల్ రితి జా అస్తి' మెనయ్ సంగుమ్లు రుజ్జు దెకిత్ రితి కెర.

9

దర్ముమ్ ఉక్కుల దెతిన్చి రిసా అన్నె సంగిలిసి

1 జలె, *యెరూసలేమ్తెచ నంపజలసక దెతి తుమ్ ఉక్కిల్లి డబ్బుల్చి రిసా అమ్ అన్నె రెగుడుక కిచ్చొక? 2 జా ఉక్కుల దెంక తుమ్ కోర్ప జలిసి ఆవ్ జాని, చి మాసిదోనియ ప్రదేసిమ్చ నంపజలసక తుమ్చి రిసా ఆవ్ సంగితిసి. కిచ్చొ సంగితసి మెలె, “†అకయ ప్రదేసిమ్చ నంపజలస పూర్ణుమ్ తెంతో జోవయించి డబ్బుల్ దెంక తెయార్ జా అస్తి” మెన ఆవ్ సంగితసి. జా దర్ముమ్ ఉక్కుల దెతి తుమ్చి సర్దచి రిసా సూన్లి రిసాయి జేవ్ మాసిదోనియచ ఒగ్గర్ జిని జా కామ్తె బెదుక కోర్ప జా అస్తి.

3 జలె, ఈంజేవ్ బావుడ్డుక కిచ్చొక తుమ్తె తెద్రయ్తసి మెలె, 'జా డబ్బుల్ ఉక్కుల తెయార్ జా అస్తి' మెన తుమ్చి రిసా అమ్ సర్ద సంగిలిసి అబద్దుమ్ నే జతి రితి తుమ్క 'నిజుమి తెయార్ జా తత్తు' మెన 'తుమ్ దెక' మెనయ్ ఆవ్ జేవ్క తెద్రయ్తసి. 4 నెంజలె, పడ్డా అంచి తెన్ ఈంజ మాసిదోనియచ నంపజలస సంగుమ్జిన్ తుమ్తె అయ్లె, తుమ్ తెయార్ నే జా తిలె, అమ్చి మరియాద గెచ్చెదె; అమ్చి కి తుమ్చి కి. 'సత్తిమ్ కెరుల' మెన అమ్ దయిరిమ్క సంగిలిసి పిట్ట తయెదె చి రిసా. 5 జాకయ్, 'అంచి కంట జేవ్ అగ్గె గెచ్చ తుమ్ సంగిలి దర్ముమ్ దెతిన్కయ్ తుమ్క తెయార్ కెర తత్తు' మెనయ్ జేవ్క బలవంతుమ్ కెర్లయ్. దస్సి, తుమ్ అగ్గెయి జా

* 9:1 9:1 క్రీస్తు యెరూసలేమ్తె మొర జివ్ జలన్, గెద, చి తొలితో ఒత్తయ్ మాన్సుల్, క్రీస్తుచ సిన్సుల్ తెన్, జోవయంక నంపజల. యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతొచ నంపజలస తోడు తెద్రయ్ల; అకయ ప్రదేసిమ్చ కి మాసిదోనియ ప్రదేసిమ్చ కి; బారికుల్ 1:28-30. † 9:2 9:2 ఆజి కాలి అకయ ప్రదేసిమ్క చి మాసిదోనియ ప్రదేసిమ్క 'గ్రీకు ప్రదేసిమ్' మెంతతి.

డబ్బుల్ తెయార్ కెర తిలె, సర్ల తెన్ దెతె, ఆరి ఇస్టుమ్ నెంజిల్ రితి నాయ్.

ముస్కి బుద్దిచి రిసొచి దర్ముమ్ బుద్దిచి రిసొచి కోడు

6 ఆవ్ కిచ్చొ మెంతసి మెలె, కో ముస్కి తెన్ బి గలెదె గే, తొక్కి పలితుమ్చి పంటొ లాయెదె. కో దర్ముమ్ తెన్ బి గలెదె గే, ఒగ్గర్ పంటొ లాయెదె. 7 ఎత్కి మాన్సు సరిగా ఉచర, 'దెంక చెంగిలి' మెన కెదిలిచి రిసొ ఉచరె గే, తెద్దిలి దెంకయ్. గని కో బలవంతుమ్ కెర్లి రితి దుకుమ్ తెన్ పొన, సర్ల తెన్సి. సర్ల తెన్ దెతొసొక దేముడు ప్రేమయ్ దెకెదె.

8 చెంగిల్ తిలిసి ఎత్కి దయ తుమ్క మొచ్చు తెన్ దెంక దేముడుచి అత్తి అస్సె, చి తుమ్క సరిపుచుప జతిసి కి, పడ్డొ కిచ్చొ కిచ్చొ చెంగిల్ కమొక తుమ్ మొచ్చు తెన్ దెంక తెరితి రిసొ కి, సరిపుచుప జతిసి తుమ్క దెంక జోచి ఇస్టుమ్. 9 దేముడుచ కొణొతె పూర్గుమ్ రెగ్గయ్లి అస్సె.

‡“జోవయింక తిలిసి జో వంట దెతయ్,
బీద సుదల్క జో దర్ముమ్ తెన్ దెతయ్,

జోవయించి జా సత్తిమ్ కెయఁక తెయఁక తాఁ గెచ్చెదె.”

10 తుమ్ బి గల్తి రిసొ బి దెతొ ప్రబు, తుమ్ కతి రిసొ అన్నిమ్ దెతొ ప్రబు, సరిపుచుప జతిసి తుమ్క దెయెదె, పలితుమ్ దెయెదె, చి తూమ్ దర్ముమ్ తెన్ బెదయ్తిన్ చి సత్తిమ్చి పలితుమ్ జో ఒగ్గర్ తయెదె. 11 తుమ్ దర్ముమ్ తెన్ దెతి రిసొ ఎత్కితె సొమ్సారుమ్ రితి జస్సె. అమ్చి అత్తి తుమ్ జా దిలె, అమ్ బీద సుదల్క దెమ్దె, చి దేముడుక జేవ్ జోచి సర్ల దెకవ జోక గవురుమ్ కెరుల. 12 దస్సి, ఈంజ దర్ముమ్చి సేవ కెర్లె, బీద జల నంపజలనక కామ్క జెతిసి దొర్కు జలిసి దా తస్సె, పడ్డొ అస్సె, “దేముడు దొర్కు కెరయ్లొ” మెన జోక జొకర జేవ్ ఒగ్గర్ గవురుమ్ కెరుల.

13 ఈంజ కామ్ తుమ్క ఏక్ పరిచ్చు రితి జయెదె. ఈంజ సేవ తుమ్ చెంగిల్ కెర్లె, తుమ్చి సత్తిమ్క రుజ్జు జయెదె. చి క్రీస్తుచి

సుబుమ్ కబుర్ ఒప్పున జోక బియఁ తుమ్ ఈంజ సత్తిమ్ కెర్లిన్చి రిసా, దేముడుక గవురుమ్ జయెదె. పడ్డొ, జేవ్ బీద జల నంపజలసక చి అన్నె బావుడ్లు ఎత్కిక తుమ్ కోడ్ దిలిన్చి దర్ముమ్చి రిసా గే దేముడుక గవురుమ్ జయెదె. 14 అన్నె, తుమ్చి పెట్టి దేముడు జోచి దయక దర్ముమ్ బుద్ది దిలి రిసా జేవ్ మాన్సుల్ తుమ్క ఒగ్గర్ ప్రేమ జా, తుమ్క దెకుక మెన ఆస తెన్, తుమ్చి రిసా కి జేవ్ ప్రార్దన కెరుల.

15 క్రీస్తుచి అత్తి దేముడు అమ్క దిలి వరుమ్ కెద్ది గే కో సంగుక నెత్తి. జోచి ఎదివాట్ దర్ముమ్చి రిసా జోక జోబర.

10

బుద్ది నే జా తిలె సిచ్చ కెరుక తయెదె

1 క్రీస్తు కిసి మెత్తన తా మాన్సుల్క కన్కారుమ్ దెకితె తిలన్ గే తుమ్ జాన్సు. జలె, ఆవ్ పవులు, క్రీస్తుచి కన్కారుమ్ దెకితి దస్సి బుద్ది తెన్ సొంత తుమ్క బతిమాల్ప జతిసి. అమ్చి రిసా సగుమ్జిన్ మాన్సుల్ సంగితిన్ కిచ్చొ మెలె, తుమ్చి మొక్క మెత్తన అస్సి, గని ఉట్ట గెలె పడ్డొ దయిరిమ్ తెన్ ఆవ్ గోల కెర్తసి, బెర్తె! 2 జలె, కిచ్చొ అప్పె బతిమాల్ప జా ఆవ్ సంగితసి మెలె, ఆవ్ తుమ్తె అన్నె అయ్లె పొదిక ఆవ్ ఇసి దయిరిమ్ తెన్ గోల కెరుక నెంజితి రితి, జేవ్ అల్లర్చ మాన్సుల్ బుద్ది జా తత్తు, నెంజిలె అప్పె కిసి డీస్తయ్ మెలె, అయ్లె కచితుమ్ జోవయింక గోల కెరుక తయెదె. అమ్క 'మాములుమ్ ఈంజయ్ లోకుమ్చ ఆసల్ ఇండితతి' మెన జేవ్ మాన్సుల్ అమ్క నింద కెర్తతి, గెద.

3 జలె, అమ్ ఈంజయ్ లోకుమ్తె జలె కి, ఆమ్ కెర్ది యుద్దుమ్ ఈంజయ్ లోకుమ్చి రగుమ్చి యుద్దుమ్ నెంజె. ఆత్మయుద్దుమ్ ఈంజ. 4 పాపుమ్చి ఉప్పిరి యుద్దుమ్ కెర్త అమ్చ అయ్దల్ ఈంజయ్ లోకుమ్చ నెంజితి. అమ్చయ్ అయ్దల్ దేముడుచి సెక్తిచ అయ్దల్, చి నయ్తాన్చి సెక్తి తిలిన్ ఎత్కిచి ఉప్పిరి; కేన్ ఒగ్గర్ సెక్తిచి జలెకి; ఈంజేవ్ అయ్దల్ జినుల. 5 దేముడు దిల ఆత్మఅయ్దల్ తెన్ని జోవయించి ఉప్పిరి విరోదుమ్ జత కొడొచి ఉప్పిరి

జినీతసుమ్, జోవయింక మాన్సుల్ జాన్తిన్క పిట్టయ్ బిడాయ్ తిల కొడొ ఎత్తిచి ఉప్పిరి జినీతసుమ్, చి మాన్సుచి మెన్సు తిలి ఎత్తి ఉచరన మార్పుప జా క్రీస్తుక బితి రితి, జోవయించ జేవ్ ఉచరన మార్పుప కెర్తసుమ్. ⁶ అన్నె, దేముడుచి ఇస్తుమ్ రితి ఇండితి రితి తుమ్ కొరిందిల్ బుద్ది జలదు మెలె, అమ్ అయ్లె కో సేంసిల మాన్సుల్ బుద్ది నే జా తిలె, జోవయించ తప్పుల్క ప్రబుచ అయ్దల్ తెన్ సిచ్చ కెరుక బిము నాయ్.

⁷ తుమ్చి మొక్క తిలిన్కయ్ తుమ్ దెకితె తత్తసు. ‘క్రీస్తుచ ఆము’ మెన తుమ్చితె కో ఉచరంతతి గే, జేవ్ కిసి క్రీస్తుచ జా అస్తి గే, అమ్క ‘జేవ్ కి క్రీస్తుచ’ మెనయ్ ఒప్పున్తు. ⁸ తుమ్క పాడ్ కెరుక నాయ్ గని క్రీస్తుచి తెడి డిట్టుమ్ కెరుకయ్ మెనయ్ జోవయించి కామ్చి రిసా ప్రబు అంక అదికారుమ్ దా అస్సె. జా అదికారుమ్చి రిసా ఆవ్ ఏక్ వేల ఇదిల్ ఒగ్గర్ సంగిలె కి, అంచి మరియాద గెచ్చుక జో సెలవ్ దెయె నాయ్.

⁹ ఆరి బియడ్డి రిసా ఇస ఉత్రల్ రెగ్గి నాయ్. దస్సి ఉచర నాయ్. ¹⁰ “జోవయించ ఉత్రల్తె డిట్టుమ్ డీస్తయ్, గట్టిజ సంగితయ్, గని ఇన్నె తిలె పొది జో బియ్ కెర జా కిచ్చో గట్టిజ సంగి నాయ్” మెన అంచి ఉప్పిరి గోస జలస సంగితతి. ¹¹ జలె, జేవ్ మాన్సుల్ కిచ్చో అర్దుమ్ కెరంతు మెలె, అమ్ నెంజిలె పొది ఉత్రుమ్తె కిచ్చో రెగుడుమ్దె గే, అయ్లె పొది కచితుమ్ జర్గు కెరుమ్దే. ¹² జోవయించి సొంత గవురుమ్ సంగన్త జేవ్ సగుమ్జిన్క దెకిలె, ‘జోవయింతెన్ సమ్మందుమ్ జలస ఆము’ మెననుక నెనుమ్, జోవయింక దెక పరిచ్చ కెరనుక నెనుమ్. బెదె నాయ్. జేవ్ ఎక్కిలోక ఎక్కిలో దెక దస తీర్పుల్ కెరంతిసి వెల్లో మెనంతిసి సూటి నాయ్. దస్సి జా జా, బుద్ది నెంజిలె రిత జతతి.

పావులీంసి సొంత గవురుమ్ సంగన్తి రితి జలిన్

¹³ సత్తిమ్ జతి కంట అన్నె గవురుమ్ సంగనుమ్ నాయ్. గని దేముడు అమ్క వంట దిలి ఎదిలి గవురుమ్ సంగనుమ్దె; సుబుమ్ కబుర్ తెన్ తుమ్చి ఎద అమ్ పావుక మెన జో అమ్క దా అస్సె.

చి జాచి రిసా సంగనుమ్దె. ¹⁴ తుమ్తెయ్ గెతి రితి అమ్క దిలి సేప పావెతి నాయ్ జలె, అమ్ తుమ్కయ్ కిచ్చొ సంగుక బెదితి నాయ్. గని దూరి జలెకి, క్రీస్తుచి సుబుమ్ కబుర్ నూనయ్తి రిసాయి ఎత్తిచి కంట ఆమి తొలితో తుమ్తె అయ్లమ్. ¹⁵ సత్తిమ్చి కంట అన్నెయ్ గవురుమ్ సంగనుమ్ నాయ్. వేర మాన్సు సైమల్ సేడ కామ్ కెర్లిన్క 'ఆమ్ కెర్లమ్' మేనుమ్ నాయ్. గని అమ్చి ఆస కిచ్చొ మెలె, తుమ్చి నముకుమ్ వడ్డిలె, తుమ్చి ప్రాంతుమ్తె అన్నె ఒగ్గర్ గచ్చిలె ప్రబుచి కామ్ అమ్ కెర్తి వాట్ దొర్కు జయెదె, ¹⁶ చి తుమ్చి ఒత్తల్తోచ ప్రాంతుమ్లుతె కి అమ్ సుబుమ్ కబుర్ నూనవుక జయెదె; వేర మాన్సుల్ కెర్లిన్క 'ఆమ్ కెర్లమ్' మెన నే సంగితె.

¹⁷ జలె,

*“కో కచి గవురుమ్ సంగుక జలె,

ప్రబుచి గవురుమ్ సంగుతు”

మెన దేముడుచి కొడెతె రెగ్గ అస్సె, గెద. ¹⁸ కిచ్చొక మెలె, సొంత గవురుమ్ సంగనై కిచ్చొ గవురుమ్ నెంజె, గని ప్రబు కక్కయ్ గవురుమ్ కెరెదె గే, జో మాన్సు నిజుమి గవురుమ్ జయెదె.

11

తప్పుచి బోద సూన మోసిమ్ జతు నాయ్

¹ అవ్ అప్పె ఇదిల్ తెలివి నెంజిల్ రితి లట్టబ్బె, దయ కెర ఒర్పుప జా! అంచి రిసా కిసి జలెకి తుమ్ దస్సి కెర్తసు. ² తుమ్క 'ప్రబుతె పూర్తి నిదానుమ్ జతు' మెనయ్ అంక ఆస. ఎక్కి మున్సున్క నిదానుమ్ తిలి తేర్చి తుమ్ జతి రితి, పెండ్లిక క్రీస్తుక తుమ్క నావ్ కెర సొర్పు దిలయ్. ³ గని పూర్గుమ్ అయి రూపుమ్ జా తిలొ నయ్తాన్ జోచి మాయక కిసి *హావ్వుక మోసిమ్ కెర్లొ గే, దస్సి తుమ్క 'క్రీస్తుక ఎక్కి మెన్సు నిదానుమ్ తత్తు నాయ్' మెన, తుమ్చి చెంగిల్ బుద్ది జో నయ్తాన్ మార్పుప కెరెదె మెన అమ్క బయిమ్.

* **10:17** 10:17 యిర్మీయా 9:24. * **11:3** 11:3 ఆదికాండుమ్ 3:1-7.

4 ఆవ్ కిచ్చొక ఇసి ఉచర్తసి మెలె, కో జలెకు తుమ్తె జా కెర, యేసుచి రిసా అమ్ బోదన కెర్తసి నాయ్, గని వేరచి సికడ్లె, తుమ్ బే బేగి జో మాన్సుక నంప కెర్తను. నెంజిలె, తుమ్క దిలి దేముడుచి సుద్ది తిలి ఆత్మ నాయ్ గని వేరయ్ ఆత్మ తుమ్క దొర్కు జలె, నెంజిలె తుమ్ నంపజలి సుబుమ్ కబుర్ నాయ్ గని వేరయ్ కోడు సూన్లె, తుమ్ జా వేరచిక నంపజా తుమ్ బే బేగి మార్పుప జతను. 5 వేర సికడ్లె 'ఒగ్గర్ వెల్లో బారికుల్' మెన తుమ్ సంగిత జేవ్ వేర మాన్సులచి కంట ఆవ్ ఎద్దికి దాక్ జయి నాయ్ మెన ఆవ్ జాని. 6 లట్టుబుక ఆవ్ తెలివి నెంజిలె కి, ప్రబుచి గ్యానుమ్ అంక అస్సి. కెయక కి కిసి జలె కి ఈంజ గ్యానుమ్ తుమ్క సొస్టుమ్ జానవ అస్సి.

7 తుమ్క 'చెంగిల్ జతు' మెన, తుమ్తె కిచ్చొ తోడు నే నజితె దాక్ కెరనయి దేముడుచి సుబుమ్ కబుర్ ఆవ్ సికడ్లెసి పాపుమ్ గే? 8 వేర సంగుమ్లుచి డబ్బుల్ ఆవ్ నజన చోర్లి రితి జా అస్సి. ప్రబుచి నావ్ తెన్ తుమ్కయ్ సేవ కెర్తి అంచి ఆసచి రిసా జా డబ్బుల్ జోవయింతె నజిలయ్. 9 పడ్డె, తుమ్చి తెన్ ఆవ్ తిలి పొది అంక కొత్కు తిలె, తుమ్చితె కక్కయ్ కి జా జాడు వయడి నాయ్. మాసిదోనియ ప్రదేసిమ్ తెంతో అయ్ల బావుడ్లు అంక కొత్కు తిలిసి ఎత్కి దిల. జాకయ్ తెదొడి తుమ్క జా జాడు వయడి నాయ్, చి అప్పె తెంతో కి కిచ్చొ జాడు కి తుమ్క వయడుక నెసి. 10 క్రిస్తుచి సత్తిమ్ అంచి పెట్టి కిసి అస్సి గే, ఈంజ ఒండి అకయ ప్రదేసిమ్తె ఆవ్ డబ్బుల్ గల్ల నే నజితిన్చి రిసా కో వేరయ్ సంగుత్ నాయ్. జేవ్ వేర సంగుక వాట్ దెయి నాయ్. ఆవ్ అప్పక కెర్లి రితి దస్సి కెర్తె తయిందె. 11 కిచ్చొక? తుమ్క ప్రేమ కెరి నాయ్ గే? తుమ్క ఆవ్ ప్రేమ కెర్తిసి 'నిజామి' మెన దేముడు జానె.

మోసిమ్ కెర్ల బారికుల్

12 'సుబుమ్ కబుర్ కామ్చి రిసా డబ్బుల్ నజనయ్ అమ్చి రితి జేవ్ కి కెర్తెతి' మెన, డబ్బుల్ ఆసక సుబుమ్ కబుర్ సూనయ్త జేవ్ అన్నె మాన్సుల్ అమ్చి రిసా సంగితతి. ఈంజ కామ్ జేవ్

కెరుక అదికారుమ్ నాయ్. పడ్డో, జోవయించి రితి అమ్ నే కెర్తినక్ రుజ్జు తతి రితి, ఆవ్ అప్పె ఎద డబ్బుల్ గట్ట నే నజితె సుబుమ్ కబుర్ కామ్ ఆరి కెర్తె తయిందె. ¹³ దస మాన్సుల్ అబద్దుమ్కయ్ “ప్రబు అమ్క ఈంజ కామ్ తియార అస్సె. జోచ బారికుల్ ఆమ్” మెనన ఆరి సంగితతి. మోసిమ్ కెర్తస, జేవ్. ఆరిక క్రీస్తుచ బారికుల్ ఆమ్ మెనంతతి. ¹⁴ దస్సి కెర్తతి మెన తుమ్ ఆచారిమ్ జంక నాయ్. నయ్తాన్ కి మోసిమ్ కెర పరలోకుమ్చి ఉజ్జిడచొ దూత రితో డీనుక జానె. ¹⁵ జాకయ్ జోచ సేవ కెర్తస కి ‘పరలోకుమ్చి సత్తిమ్చ సేవ కెర్తస ఆమ్’ మెన ఆరి సంగనుల ఆచారిమ్ నెంజె. గని జేవ్ కెర్ల కమొ కొల్లి ఆకర్క సిచ్చయ్ జవుల.

¹⁶ జలె, అన్నెక్ సుట్టు ఆవ్ సంగితసి. కిచ్చొ మెలె, అంక వెర్రి మెన కో ఉచర నాయ్. గని ‘వెర్రి’ మెన ఉచరె, అంక బెదవన జా, చి అంక ఇదిల్ జవున్ గవురుమ్ తయెదె. ¹⁷ ఆవ్ అప్పె సంగితిసి ప్రబు సంగిలిసి మెన నెంజె, గని దయిరిమ్ తెన్ ఇసి గవురుమ్ సంగుక తెలివి నెంజిల్ రితో జతసి. ¹⁸ ఒగ్గర్జిన్ ఈంజ లోకుమ్చ కమొచి రిసా గవురుమ్ సంగనుల. ఆవ్ కి గవురుమ్ సంగనిందె. ¹⁹ తుమ్క బుద్ది అస్సెచి రిసా బుద్ది నెంజిలనక సర్ద తెన్ ఓర్పుప జతసు! ²⁰ మెలె, ఎక్కిలో తుమ్క దెర్పు సేడయ్లె, నెంజిలె మోసిమ్ కెర తుమ్చి అత్తి లాబుమ్ కెరన్లె, నెంజిలె బడాయ్ జా వెల్లో మెనన్లె, నెంజిలె తుమ్క మొక్కె పెట్టె, తుమ్ ఓర్పుప జతసు! ²¹ దస అల్లర్ కమొ కెరుక ఆమ్ నెత్తిర్లమ్ మెన లాజ్ తెన్ ఆవ్ ఒప్పునుక, ఏక్! గని జోవయింతె కో కిచ్చొచి రిసా గవురుమ్ సంగన్లె; ఆవ్ అప్పె తెలివి నెంజిల్ రితి లట్టబ్బసి; ఆవ్ కి దస్సిచి రిసా గవురుమ్ నజనుక దయిరిమ్ అస్సె. ఆవ్ తెలివి నెంజిల్ రితి కొడొ జతసి. ²² జేవ్ ఎబ్రీయుల్ జవుల గే? ఆవ్ కి ఎబ్రీయుడు! జేవ్ ఇస్రాయేలుల్ జవుల గే? ఆవ్ కి ఇస్రాయేలుడు. జేవ్ అబ్రాహామ్చి సెకుమ్తె జెర్మిల గే? ఆవ్ కి జోచి సెకుమ్తె జెర్మిలయ్. ²³ జేవ్ క్రీస్తుచ సేవ కెర్తస గే? జలె, జోవయించి కంట ఆవ్ చెంగిల్చి. ఆవ్ అప్పె వెర్రి రితి లట్టబ్బె

తుమ్ చెమించుప కెర. జోవయించి కంట ఆవ్ కీసి చెంగిల్చి జోచో సేవ కెర్తొసా జయిందె మెలె, జోచి సుబుమ్ కబుర్ సూనయ్తి రిసా జోవయించి కంట ఆవ్ అన్నె ఒగ్గర్ †కామ్ కెర అస్సి, ఈంజ కామ్చి రిసా అన్నె ఒగ్గర్ సుట్టు జేలి జా అస్సి, ఒగ్గర్ సుట్టు దెబ్బల్క సిచ్చ జా అస్సి, ఒగ్గర్ సుట్టు మొర్తి రితి జా తిలయ్. 24 యూదుల్చ వెల్లెల మాన్సుల్ పాచ్ సుట్టు కొర్డ తెన్ ముప్పయ్నొవ్వు దెబ్బల్చి సిచ్చ అంక పెట అస్తి. 25 తివ్వెరి డండల్ తెన్ అంక పెట అస్తి, ఏక్ సుట్టు పత్రల్ గల అంక మారిత, తివ్వెరి ఓడతె గెలి పొది ఓడ పత్రె లయతయికయ్ డుజ గతయ్, ఏక్ సుట్టు ఒండి మెద్దెనె ఒండి సరారాతి సముద్రుమ్తె సేడ తిలయ్. 26 ఒగ్గర్ సుట్టు దూరి ప్రయానుమ్ గెచ్చ అస్సి. దసితె గడ్డో జీన్తి ప్రమాదుమ్, చోర్లుచి రిసాచి ప్రమాదుమ్, అంచి సొంత దేసిమ్చ మాన్సుల్చి రిసాచి ప్రమాదుమ్, యూదుల్ నెంజిలసచి అత్తి ప్రమాదుమ్ కి జా అస్సి. పట్నల్తె, బయిలు దేసిమ్లుతె, సముద్రుమ్తె కి ప్రమాదల్ జా అస్సి. మోసిమ్క ‘నంపజలస ఆమ్’ మెనన్లసచి అత్తి కి ప్రమాదల్ జా అస్సి. 27 ఒగ్గర్ కామ్ కెర కెర సైమల్ సేడ అస్సి. ఒగ్గర్ రాతివొ నిజె నాయ్, ఒగ్గర్ సుట్టు చువ్వె తన్నె తా అస్సి, ఒగ్గర్ సుట్టు అంక అన్నిమ్ దొర్కు జయె నాయ్, ఒగ్గర్ సుట్టు చల్లిక, పాలల్ నెంజిలిన్క బాద సేడ అస్సి. 28 జేవ్ ఆవ్ సేడ్ల బాదల్ ఎత్కిక పిట్టవ అన్నె కిచ్చొ మెలె, ప్రబుచ సంగుమ్లు ఎత్కిక ‘చెంగిల్ తత్తు’ మెనయ్ ఉచరై తతిసి అంక పెల్లితయ్, కామ్ రితి జతయ్. 29 కో డిట్టుమ్ నెంజిలె, ఆవ్ కి డిట్టుమ్ నెంజిలి రితి దుకుమ్ జతసి; జోవయించి జాడు వయిలి రితి. కో పాపుమ్తె దెర్ను సేడ్లె, అంక ఒగ్గర్ దుకుమ్ తయె నాయ్ గే? ఒగ్గర్ దుకుమ్ జతసి.

30 జలె, ఆవ్ గవురుమ్ నజనుక జలె, కిచ్చొచి రిసా గవురుమ్ సంగనిందె మెలె, ఆవ్ అప్పు తిలిన్చి రిసాయి గవురుమ్ సంగనిందె. 31 ఆవ్ సంగిలిన్ ఎత్కిక ‘అబద్దుమ్ నెంజె’ మెన ప్రబు జలో యేసుక అబ్బొన్ జలో కెయ్క తెయ్క మెచుప జతోసా మెన దేముడు జానె.

† 11:23 11:23 బారికుల్ 9:1-31, 11:24-30, చి 13 అద్యయిమ్ తెంతొ 28 అద్యయిమ్ ఎద నదు కెర.

32 పడ్డో, అన్నె ఏక్ బాద ఆవ్ సేడ్లిన్చి రిసా గవురుమ్ నజనుక పచ్చ గెలయ్. కిచ్చొచి మెలె, దమస్కు పట్టుమ్తె అంక 'దెర్లు' మెన జా సుట్టు అరెత రానొచి తెడిచొ అదికారి జా పట్టుమ్చ సయ్న్యుమ్ సుదల్క రకడ్లన్, 33 గని నంపజలన అంక †గంపతె వెసడ పట్టుమ్చి కోటచి ఉప్పిర్చి గదితె వెగడ దా, కిట్కివాట్ వాలివొ తెన్ కోటచి ఒత్తల్తో ఉత్తవ దిల, చి జో అదికారితె దెర్లు నే సేడ్తె ఉట్ట అయ్లయ్.

12

పవులు చి సివ్వు

1 జలె, ఆవ్ గవురుమ్ నజనుక అస్సె. గవురుమ్ సంగన్లె అంక లాబుమ్ నాయ్, గని ప్రబు దెకయ్ల సివ్వుల్చి రిసా, జో దెకయ్ల రుజ్జుల్చి రిసా ఆవ్ సంగిందె. 2 క్రీస్తుచొ మాన్సు ఎక్కిలోక జాని. అప్పె చొవ్ల వెర్పుల్ జలి, ఈంజొ మాన్సు పరలోకుమ్తె ప్రబు తిలిన్తె ఉక్కిల్ జలో. ఈంజొ మాన్సు ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఉక్కిల్ జలి గే నేని, దేముడు జానె. 3 గని పరలోకుమ్చి ఒత్తచి పరదీసుతె నిజుమ్ ఉక్కిల్ జలో మెన జాని. ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఒత్త గెలి గే నేని, గని దేముడు జానె. 4 ఒత్త కిచ్చొ సూన్లొ గే కేన్ మాన్సుకి అన్నె సంగుక నెత్తె, సంగుక నెంజె. 5 ఈంజొ మాన్సుచి రిసా ఆవ్ గవురుమ్ సంగిందె, గని అంచి నావ్ తెన్, జలె, ఎక్కి ఆవ్ అప్పు తిలిన్చి రిసాయి సంగనిందె. గని వేరచి రిసా, జలె, గవురుమ్ సంగి నాయ్.

6 ఆవ్ గవురుమ్ నజనుక ఉచరె, అంక వెర్రి మెనుక, బుద్ది నెంజిలోసా మెనుక నెంజె. కిచ్చొక మెలె, ఆవ్ సంగితిసి సత్తిమ్ గని అంచితె దెకితి కంట సూన్తి కంట కో అంక అన్నె గవురుమ్ ఉచరుక అంక ఆస నాయ్ చి రిసా తుక్లె తయిందె. 7 పడ్డో, ప్రబు అంక ఒగ్గర్ రుజ్జుల్ దెకయ్లిన్చి రిసా ఆవ్ నే పులితి రితి, అంక ఏక్ బాద తంక

† 11:33 11:33 బారికుత్ 9:23-25.

జోసెలవ్ దా అస్సె. కిచ్చొ మెలె, సయ్తాన్ అంక అల్లర్ కెర్తి రితి అంచి అఱి కంటొ బూస్తి రితి ఏక్ బాద దా అస్సె; అంక 'పులుస్ నాయ్' మెన. 8 జలె, 'ఈంజ బాద అంక ములుస్' మెన, తివ్వెరి ప్రబుక బతిమాల్ప జా ప్రార్దన కెర్లయ్, 9 గని జో అంక, "అంచి దయ తుక సరిపుచుప జయెదె. తుయి అవ్కు తిలె, తుచి అత్తి ఆవ్ కెర్తిన్తె అంచి సెక్తి పూర్తి డీసెదె" మెనయ్, ప్రబు సంగిలన్. జాకయ్ ఆవ్ అవ్కు తిలిసి అన్నె సర్ల తెన్ ఒప్పనిందె, చి క్రీస్తుచి సెక్తి అంచితె కామ్ కెరెదె. 10 జాకయ్, క్రీస్తు గవురుమ్ జతి రిసా ఆవ్ అవ్కు తిలె, మాన్సుల్ అంక నిస్కారుమ్ కెర్లె, ఆవ్ సైమల్ సేడ్లె, విరోదుమ్ సుదల్ అంక అల్లర్ కెర్లె. ఆవ్ కస్టల్ సేడ్లె, అంక సర్ల. కిచ్చొక మెలె, ఆవ్ అవ్కు తిలె పొది, ఆవ్ అవ్కు తిలిన్తె ప్రబుచి సెక్తి బార్ జా జోచి గవురుమ్ దెకయ్తయ్.

సత్తిమ్ నెంజిల 'బారికుల్'

11 ఆవ్ ఈంజ ఎత్తి సంగిలిసి తెలివి నెంజిల్ రితి, గని ఆవ్ సంగిత్ రితి తుమి వెలయ్లదు. తుమి అంచి రిసా 'సత్తిమ్చొ' మెన సాచి సంగితదు జలె, జతి. కిచ్చొక మెలె, జేవ్ వేరయ్ మాన్సుల్; 'ఒగ్గర్ వెల్లొ బారికుల్' మెన తూమ్ సంగితస; కిచ్చొ నెంజిలె కి ఆవ్ జోవయించి కంట ఇద్దికి దాక్ నెంజి. 12 క్రీస్తుక సత్తిమ్చొ బారికి ఆవ్ జలిన్క రుజ్జుల్ దెకయ్త కమె తుమ్చి మొక్కె జర్గు జల. మెలె, ఒగ్గర్ బాదల్ సేంతుమ్ తెన్ ఓర్పుప జలయ్, చి ప్రబు జోవయించి సెక్తిచ రుజ్జుల్ దెకయ్లో, ఈంజ లోకుమ్తె నెంజిల కమె దెకయ్లో, వెల్లెల వెల్లెల కమె జర్గు కెర్లొ.

13 జలె, ప్రబుచ అన్నె సంగుమ్లుచి కంట తుమ్క కిచ్చొ పిట్టి? ఎక్కి పిట్టి మెలె, ఆవ్ జతి డబ్బుల్ తుమ్తె నజీ నాయ్. ఈంజ తప్పు అంక చెమించుప కెర, 'తప్పు' మెంతసు జలె!

అమ్తె లాబుమ్ కెరన్లది, అమ్క మోసిమ్ కెర్లది

14 ఈయన, అన్నెక్ నుట్టు తుమ్తె జెంక తెయార్ జా అస్సి. ఇన్నెతెన్ ఆవ్ అయ్లినీ తివ్వెరి జయెదె. అయ్లె, తుమ్క కిచ్చొ జాడు వయడి నాయ్. కిచ్చొక మెలె, తుమ్చి ఆస్తి ఆవ్ నెసి, గని తుమ్చి ప్రేమకయ్ అంచి ఆస. *అయ్యున్క అబ్బొన్క పొస్తి రితి బోదలీ కుడవక కెరనుక పూచి నాయ్, గని జోవయించ బోదల్క పొస్తి రిసా అయ్యుసి అబ్బొన్ కుడవక కెర అస్సె. 15 తుమ్చ అత్తల్క 'చెంగిల్ జతు' మెన ఆవ్ సర్ల తెన్ సన్ఘమ్ జయిందె, అంచి జివు దెయిందె. ఆవ్ తుమ్క ఒగ్గర్ ప్రేమ కెర్లె, తుమి అంక తొక్కి ప్రేమ కెర్లె చెంగిల్ గే? తుమ్ ఉచర.

16 నాయ్, ఆవ్ జితిన్చి జాడు తుమ్క వయడి నాయ్, గని 'జో మోసిమ్చొ, తెలివి తెన్ అమ్క మోసిమ్ కెర్లె' మెన తుమ్ అంక సంగితసు. 17 జలె, తుమ్తె ఆవ్ తెద్రయ్లస చి అత్తి తుమ్తె కెయ కిచ్చొ లాబుమ్ కెరన్లయ్ గె? నాయ్, గెద. 18 'గో' మెన తీతుక బలవంతుమ్ కెర్లయ్, చి జో తెన్ జో అన్నెక్ బావొక తెద్రయ్లయ్. తీతు జవున్ తుమ్క మోసిమ్ కెర్లె గే? నాయ్, గెద. ఆమ్ కి జోచి బుద్ది తెన్ ఇండుమ్ నాయ్ గే? ఆమ్ కి జోచి రితి జిము నాయ్ గే?

తుమ్తె జెతి పొదిక తుమ్ సత్తిమ్ జా తా

19 అమ్చి సత్తిమ్ సంగితిన్క 'ఎక్కి జోవయించి సొంత నావ్ తతి రిసాయి అమ్చి మొక్కె సంగితతి' మెన ఉచరె తిలదు గే? నాయ్, అమ్చి ఉద్దెనుమ్ దస్సి నాయ్. క్రిస్తుచి తెడి దేముడుచి మొక్కె సంగిలమ్, సంగితసుమ్. 20 కిచ్చొక మెలె, ఆవ్ తుమ్తె తిలె, తుమ్ వేర మార్పుప జా తస్తె మెన, పడ్డొ తుమ్ అంకయ్ దెకిలె, 'జో దస్సి అస్సె, చి అమ్క ఇస్తుమ్ నాయ్' మెన తుమ్ సంగితె మెనయ్ అంక బయిమ్. అన్నెకిచ్చొ మెలె, తుమ్ జట్లు తెన్, గోసల్ తెన్, కోపల్ తెన్, 'అన్నె మాన్సుల్ కీన్ జలె జతు గని అమ్మి చెంగిల్ కెరనుమ' మెలి రితి బుద్ది తెన్ ఏక వేల తస్తె. ఎక్కిలోచి రిసా ఎక్కిలో ఆరిచ నిందల్,

* 12:14 12:14 పవులు జేవ్ కొరింధిల్క అయ్యున్ అబ్బొన్ రితి జయెదె, గెద. జొయ్యు జోవయింక తొలితొ సుబుమ్ కబుర్ నూనయ్లో, గెద.

సాండెల్ కొడొ సంగితె తస్తె, పుల తస్తె, ముద్దొ నెంతె తస్తె మెన ఆవ్ బితసి.

²¹ అన్నె కిచ్చొచి రిసా ఆవ్ బితసి మెలె, ఆవ్ తుమ్తె అన్నె అయ్లె, తుమ్చి రిసా దేముడుచి మొక్కె లాజ్ జయిందె, చి తుమ్చి తెచ పాపుమ్ కెర అప్పక పాపుమ్ నే ఒప్పున్లసచి రిసా ఆవ్ ఏడుక తయెదె. కేన్ పాపల్ మెలె, లంజెబుద్ది, లంజెకమొ, ఆగ్చ ఆసల్ ముద్దొ నే కెరంతిసి, దసచ జేవ్ ఇండితిసి.

13

ప్రబుచి సెక్తి తెన్ తీర్పు కెరుక తయెదె

¹ ఆవ్ తుమ్తె అన్నె అయ్లె ఇన్నెతెన్ తివ్వెరి జయెదె. అయ్లె, కక్క తీర్పు కెరుక జలె, దొగుల తీగ్ల సాచుల్చి సాచి బెద, రుజ్జు జంక. ² అగ్గె పాపుమ్ కెర్లసక చి జేవ్ అన్నె ఎత్తిజిన్క అగ్గె జాగర్ల సంగిలయ్; సిచ్చ కెరుక జయెదె, మెన. ఆవ్ అప్ప ఒత్త నెంజిలె కి, జా సుట్టు ఆవ్ ఒత్త గెచ్చ తిలి పొది; తెదొడి ఆవ్ తివ్వెరి తుమ్తె జా తిలయ్, గెద. జలె, తెదొడి సంగిలి రితి, అప్పె కి కిచ్చొ సంగితసి మెలె, ఆవ్ అయ్లె పొది జేవ్ చెంగిల్ నే జా తిలె, కచితుమ్ తీర్పు కెర సిచ్చ దెయిందె.

³ “తుయి సంగితిన్క ‘క్రీస్తు సంగిలిసి’ మెన అమ్ చినితి రిసా రుజ్జు దెకవు” మెన అంక తుమ్ కొంకడ్లసు. ఆవ్ అయ్లె, రుజ్జు దెకితె. తుమ్చి రిసా క్రీస్తు అప్పు జయె నాయ్. తుమ్తె జోచి సెక్తి దెకయ్తయ్! ⁴ నిజుమి, జో మాన్సు జెర్మన్ జలిన్క అప్పు తతికయ్, సిలువతె జోక మార్ల, గని దేముడుచి సెక్తిక జో జీవ్ జా ఉట్ట జితయ్. అన్నె, జో తెన్ ఆమ్ కి అప్పు అస్సుమ్, గని తుమ్క ‘చెంగిల్ జతు’ మెనయ్ అమ్ తుమ్క బుద్ది సంగుక సిచ్చ కెరుక మెలె, యేసుక జియణ్ణో దేముడుచి సెక్తికయ్ జర్గు కెరుమ్దే. క్రీస్తు తెన్ జయి సెక్తిక జితసుమ్.

⁵ తుమ్, తుచి నముకుమ్తె నిదానుమ్ జా అస్సున్ గే నాయ్ గే, తుమ్క తుమి పరిచ్చ కెరన. రుజ్జుల్ దెకన. యేసుక్రీస్తు తుమ్చి పెట్టి

అస్సె మెన తుమ్క తుమి నేన్సు గె? గని ఏక్ వేల జో తుమ్చి పెట్టి నాయ్ జలె, చి పరిచ్చతె తుమ్ ఓడుప జా అస్సున్. ⁶ జా పరిచ్చతె ఆమ్, జలె, ఓడుప నే జలిసి తుమ్క రుజ్జు డీసున్ మెన అంచి ఆస.

⁷ అమ్చి సత్తిమ్ రుజ్జు జతి రిసా నాయ్, గని ఆమ్ ఓడుప జలి రితి డీసిలెకి నే డీసిలెకి, 'చెంగిల్ తిలిన్ కెర్తు' మెన, 'పాపుమ్ కెర్తు నాయ్' మెన, తుమ్చి రిసా దేముడుక అమ్ ప్రార్దన కెర్తసుమ్. ⁸ సత్తిమ్ పిట్టవుక నెత్తుమ్, సత్తిమ్ పిట్టవుక అమ్క ఇస్టుమ్ నాయ్. సత్తిమ్ కెర్తి రిసాయి అమ్చి ఆస. ⁹ అమ్ అప్పు తిలె, తుమ్ డిట్టుమ్ తిలె, అమ్క సర్ద. అమ్ కిచ్చొచి రిసా ప్రార్దన కెర్తసుమ్ మెలె, తుమ్క 'అప్పెచి కంట ఆత్మక అన్నె చెంగిల్ జతు' మెనయ్ ప్రార్దన కెర్తసుమ్.

¹⁰ తుమ్క ఆవ్ దూరి తిలి పొది ఆవ్ కిచ్చొక ఇసి రెగిడ్డిసి మెలె, ఆవ్ అయ్లె పొదిక ప్రబు దిలి అంచి అదికారుమ్క తుమ్క సిచ్చ కెరుక నెంజిలె, అంక సర్దయ్ తయెదె. జా అదికారుమ్ ముక్కిమ్క అంక కిచ్చొక ప్రబు దా అస్సె మెలె, నంపజలసక పాడ్ కెరుక నాయ్, గని జోవయించి ఆత్మక డిట్టుమ్ కెరుకయ్ దా అస్సె.

ఆకర్ కోడు

¹¹ జలె, బావుడ్లు, తుమ్ చెంగిల్ తా, పూర్తి బుద్ధి తెన్ ఇండుక ఆస జా మార్పుప కెరన మెన ఆవ్ బతిమాల్పా జా సంగిలిసి దెరన, ఎక్కిలో తెన్ ఎక్కిలో ప్రేమ తెన్ తా. సేంతుమ్ తెన్ బెద కట్టు తెన్ జియ, చి ప్రేమ తిలొ సేంతుమ్ తిలొ దేముడు తుమ్చి తెన్ తయెదె. ¹² ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జోకర. ¹³ ఇన్నెచ నంపజల బావుడ్లు ఎత్కిజిన్ తుమ్క జోవయించి ప్రేమ సంగ తెద్రయ్తతి.

¹⁴ ప్రబు జలొ యేసుక్రీస్తుచి దయ, దేముడుచి ప్రేమ, అన్నె జోచి సుద్ది తిలి ఆత్మ దెతి కట్టు తుమ్ ఎత్కిజిన్చి పెట్టి తవున్, తుమ్చి నెడిమి తవున్.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4